



سِفْر الرجوع

ספר החזרות

د / محمد إبراهيم

سِفْرُ الرِّجْوَعِ

قصص قصيرة

د/ محمد إبراهيم

جمهورية مصر العربية

الطبعة الأولى

2021

إلى كل من آمنوا بنا
وساندونا

لا جزى الله دمعَ عينيَ خيراً وجزى الله كلَّ خيرٍ لسانى
نم دمعى فليس يكتمُ شيئاً ورأيتُ اللسانَ ذا كتمانِ
كنتُ مثلَ الكتابِ أخفاهُ طيُّ فاستدلُّوا عليه بالعنوانِ
" العباس بن الأحنف "

آدم وفريدة

يجلس المعلم سالم أمام دكانه لبيع قطع غيار السيارات ، مرتدياً قميص مشجر من الحرير ، ومرتدياً فى يده خاتم كبير من الذهب ، وقد صبغ شعره حتى يخفى الشيب وعمره الذى تجاوز الستين ، وهو يدخن الشيشة ويحتسى الشاي ، وإلى جواره صديقه المعلم جبر .

وأثناء ذلك ، يخرج من المنزل الموجود به الدكان ، آدم وفريدة ، متجهان إلى عملهما ، فهما يعملان موظفان بإحدى المصالح الحكومية .

نظر سالم لفريدة ، وهى تسير بجوار زوجها آدم ، نظرة شهوانية ، وتفحص جسدها من رأسها حتى كعبها ، ثم قال لصديقه جبر : يا أخى مش عارف البت فريدة إيه اللى عاجبها فى جوزها الجعر آدم ، لا منظر ولا مال ، واد بيكح تراب .

جبر : بيحبوا بعض .

سالم : حب إيه ؟، دى عايزة واحد زى ينغنها فى العز .

جبر : إيه يامعلم ؟، إنت عينك زاغت عليها ؟.

سالم : نفسى فيها من زمان ، هى دى اللى تدلعنى وترجعلى شبابى .

جبر : لكن فرق السن بينكم كبير ، وكمان متجوزة .

سالم : ماهو لو الواد ده يطلقها ، أتجوزها على طول .

جبر : ومراتك ؟.

سالم : مراتى عجزت ، وما خلفتش غير بنت واحدة ، نفسى فى فريضة تدلبنى وترجع لى شبابى ، وتجيب لى الولد ، بس إزاي .

جبر : واللى يخلي آدم يطلقها وتتجوزها ، تعمل معاه إيه ؟.

سالم : أنفذ له كل طلباته .

جبر : طيب ، أنا هأخليه يطلقها ، بس على شرط ، تسبيلي المزاد الجاي بتاع شركة الحديد .

سالم : موافق .

جبر : شوف يامعلم ، إنت تقرب من الواد آدم ، وتاخذه تحت جناحك ، الواد مديون وظروفه زفت ، وبعدين عشمه إنه يتجوز بنتك ، واش شرط....

سالم مقاطعاً : أنا أجوز بنتى للهلفوت ده .

جبر : مين قال كده ، صبرك بالله يامعلم ، إنت هتعشمه بس ، وهو هيفرح علشان هيناسبك ، واش شرط عليه ، إنه يطلق مراته الأول ، وبعد ما يطلقها ، تتجوزها إنت .

سالم : والله كلام يتوزن بالذهب .

وبدا سالم فى التقرب من آدم رويداً رويداً ، وفى أحد الأيام ، قال له : بقولك إيه ياآدم يابنى ، المثل بيقول اخطب لبنتك وما تخطبش لإبنك ، وأنا عندى بنت وحيدة ، هى اللى طلعت بيها من الدنيا ، وكل مالى وأملاكى هيبقوا ملكها .

آدم : ربنا يديك طولة العمر يامعلم ، وتجوزها وتفرح بولادها .

سالم : ماهو ده اللى نفسى فيه ، وكل ما يجيلها عريس ترفضه ، لحد ما أخذت بالى إنها معجبة بيبك ، وسألتها وصارحتنى ، وما أكذبش عليك زعقت وبهدلت الدنيا ، بس لقيت البنت بتحبك ، وإنت يابنى إنسان محترم ، ومش هالاقى لها أحسن منك ، إنت اللى هتحافظ عليها .

آدم : لكن يامعلم ، أنا متجوز ، وبحب مراتى .

سالم : شايف العز والمال ده كله ، هيبقى بتاعك ، وهاسدد كل ديونك ، بس خد بالك ، بنتى ما تدخلش على ضرة .

صمت آدم للحظات ، ولكن سالم بادره ، وأخرج من خزينة الدكان ثلاثين ألف جنيه .

سالم : خد ياآدم ، دول ثلاثين ألف جنيه ، سدد ديونك ، ودلع نفسك ، وفكر فى اللى قتللك عليه .

رفض آدم أخذ النقود ، ولكن سالم أصر عليه حتى أخذها ، وانصرف إلى منزله ، بعد أن أمضاه سالم على إيصال أمانة بالمبلغ ، حتى يفكر فى العرض

الذى عرضه عليه .

عاد آدم لمنزله وهو واجم ، وقابلته فريدة بابتسامتها الجميلة المعتادة ، ولاحظت وجهه المتغير ، فقالت : مالك يا حبيبي ؟!.

آدم : مفيش يا حبيبتى .

فريدة : إيه الكيس اللي فى إيدك ده ؟!.

آدم : دول ثلاثين ألف جنيه من المعلم سالم ، خلانى اخدهم ، بيقول عايز يساعدى فى تسديد ديونى .

فريدة : وتأخذ منه فلوس ليه ، الديون إن شاء الله هنسددها ، إنزل رجعم ليه تانى .

آدم : خليه معاكى دلوقتى وأبقى أرجعهم بعدين .

لم يستطع آدم النوم فى تلك الليلة من كثرة التفكير ، وظل على هذه الحال لمدة ثلاث ليالى ، يفكر فى هذا العرض ، وبعد عدة أيام غلبته شقوته ، وذهب للمأذون وطلق فريدة غيابياً ، وأرسل إليها ورقة الطلاق ، ولم يكن عنده القدر الكافى من الشجاعة على مواجهتها ، فلم يعد مجدداً للمنزل .

ثم ذهب للمعلم سالم ، وقال : أنا طلقت فريدة يامعلم ، عايزين نحدد ميعاد فرحى على بنتك .

سالم : لا ياحلو ، لما تخلص العدة ، أضمن منين إنك ما ترجعش فى كلامك

وبعد ما تتجاوز بنتى ترد فريدة تانى ، العدة تخلص الأول ، وبعدين نحدد ميعاد الفرح .

وصلت ورقة الطلاق لفريدة وكانت صدمة عمرها ، لماذا ، بعد هذا الحب ، وهذه السنين يطلقها آدم ، دون حتى أن يبدى لها الأسباب ، ما الخطأ الذى أخطأته فى حقه حتى يقدم على هذه الفعلة .

وبعد أن مرت شهور العدة ، ذهب آدم للمعلم سالم ، وقال : العدة خلصت أهى يامعلم .

سالم : بصراحة يابنى بنتى غيرت رأيها ، وفيه واحد إتقدم لها ، ووافقت عليه ، معلىش مفيش نصيب .

آدم : مفيش نصيب ؟! ، إزاي ؟!.

سالم ، بصوت عالى : أهو ده اللى حصل ، يلا غور من هنا .

مشى آدم وهو تائه ، لقد ضحى بحب عمره من أجل المال ، ففقد حبيبته ولم يحصل على المال ، لقد خسر كل شئ نتيجة طمعه .

وبعد عدة أيام ، كان المعلم سالم جالس فى دكانه مع صديقه جبر ، فقال سالم : أنا هاروح الليلة أخطب فريدة .

جبر : لا ، إستنى .

سالم : أستنى إيه ؟! ، ما خلاص إتطلقت ، وعدتها خلصت .

جبر : لو إنت رحت بنفسك هترفضك ، ما تنساش فرق السن اللى بينكم .

سالم : أمال هاعمل إيه ؟.

جبر : إنت بكرة تروح للشيخ أبوالمحاسن ، إمام الجامع وتكلمه ، هو صاحب أبوها وراجل كل الناس بتقدره ، وهو يروح يخطبها لك ، هيقدر يأثر عليها ، ومش هتقدر ترفض طلبه .

سالم : عندك حق .

وفى اليوم التالى وقت صلاة الظهر ، دخل سالم المسجد ربما لأول مرة فى حياته ، وبعد الصلاة جلس مع الشيخ أبوالمحاسن وحدهما وحدثه فى موضوع فريدة .

فقال الشيخ أبوالمحاسن : أنا هاروح لها بعد العصر وافاتها فى الموضوع وأعرض عليها طلبك ، والقرار الأول والأخير ليها يامعلم .

سالم : ما إحنا عايزين همتك معانا ياشيخ .

الشيخ أبوالمحاسن : أنا هأنقل ليها كل كلامك ، زى ما قلتها بالظبط ، وبعد صلاة العشا هاجيب لك الرد وربنا يعمل ما فيه الخير .

وبعد صلاة العصر ، وأثناء خروج الشيخ أبوالمحاسن من المسجد ، قابله جمال ، أحد سكان الشارع .

جمال شاب قريب فى العمر من فريدة ، يعمل بإحدى الشركات .
فقال جمال ، بعد أن سلم على الشيخ أبوالمحاسن : فيه موضوع كنت عايز
أكلمك فيه يامولانا .

الشيخ أبوالمحاسن : خير ياجمال يابنى .

جمال : أنا عايز أخطب فريدة ، وكنت عايزك تكلمها تشوف رأيها .
صمت الشيخ أبوالمحاسن للحظات ، ثم قال : ماشى يابنى ، أنا رايح عندها
دلوقتى ، هأكلمها وأرد عليك .

ثم ترك جمال واتجه لمنزل فريدة ، وبعد أن دخل ورحبت به ، وأحضرت له
الشاي ، قال : شوفى يافريدة يابنتى ، أبوكى صاحب عمرى ، وإنتى فى مقام
بنتى ، وفيه ناس كلمتنى عليكى علشان الجواز .

فريدة : أنا مش عايزة أتجوز تانى ياعمى .

الشيخ أبوالمحاسن : يابنتى إنتى عايشة لوحداك ، والجواز ستر ليكى ، إنسى
اللى حصل من آدم ، وإبدأى حياة جديدة .

ثم أخبرها بطلبى الزواج ، من المعلم سالم ومن جمال ، فقالت فريدة : ياعمى
إنت فى مقام أبويا ، إنت تختار ليا مين .

الشيخ أبوالمحاسن : شوفى يابنتى المعلم سالم راجل مقتدر لكنه قد أبوكى ،

غير إنه راجل أخلاقه مش ولا بد ، وجمال شاب على قد حاله لكن الفلوس مش كل حاجة ، بصراحة جمال هو اللى هيقدرك ويحافظ عليكى ، أنا لو هأختار ، أختار جمال ، لكن الإختيار والقرار ليكى لوحدك ، أنا بأقول رأيى وبس . صممت فريدة : وأنا بأثق فى حضرتك ، وفى رأيك .

الشيخ أبوالمحاسن : على بركة الله ، أنا هأبلغ جمال بموافقتك ، وأعرف سالم إن مفيش نصيب .

وبعد صلاة العشاء ، ذهب الشيخ أبوالمحاسن للمعلم سالم ، وأخبره برفض فريدة الزواج منه ، ولكنه لم ييأس وحاول مرة أخرى وذهب إليها بنفسه ، وقوبل بالرفض مجدداً .

وبعد عدة أيام ، تم إعلان خطبة فريدة على جمال ، فاستشاط سالم غضباً . وقرر أن ينتقم فى شخص آدم ، فأرسل إليه بأن يعيد الثلاثين ألف جنيه ، وإلا سوف يشتكيه بإيصال الأمانة ويودعه السجن .

وحدث آدم نفسه ، قائلاً : تستاهل ، ضيعت فريدة حب عمرك علشان الفلوس ، ودلوقتى هتتسجن ، دا ذنبها ، إنت ظلمتها .

وظل طول الليل يبكى على ما أضاعه .

وفى اليوم التالى ، ذهب لجمال فى مكان عمله ، وبعد أن جلس معه ، قال : أنا كنت سايب مع فريدة أمانة ، لو ممكن تكلمها لى تجيبها .

جمال : مفيش مانع ، ولّا أقولك أنا رايح عندها بعد الشغل تعالى معايا ، علشان تاخذ أمانتك بنفسك .

آدم : مفيش داعى ، مش عايز أسبب لك أى إحراج .

جمال : مفيش إحراج ولا حاجة .

وبعد أن إنتهى جمال من عمله ، إصطحب آدم وذهبا لمنزل فريدة ، فرحبت بآدم وجلس ثلاثتهم فى غرفة الجلوس ، فقال جمال : الأستاذ آدم بيقول إن فيه أمانة كان سايبها معاكى .

فريدة : مضبوط ، لحظة واحدة هاجيبها .

ثم دخلت غرفتها وأحضرت المال فى كيسه ، كما أعطاه لها آدم من قبل .

فريدة : هى دى الأمانة بتاعتك ، زى ما إنت إديتهالى .

نظر آدم لفريدة متحسراً ، ولم يستطع أن يتمالك نفسه ، فبكى وأجهشت هى الأخرى بالبكاء .

صمت جمال أمام هذه اللحظة ، وعلم فى قرارة نفسه أن آدم وفريدة مازالا يحبان بعضهما البعض ، ودفعته شهامته أن يساعدهما على العودة لبعض مجدداً ، فقال : لو سمحت ياأستاذ آدم هأكلم فريدة كلمتين على إنفراد .

وأخذ فريدة ودخلا الغرفة المجاورة ، وقال : إنتى بتحبى آدم يا فريدة وهو كمان بيحبك ، سامحيه وإرجعيله ، صدقيني ، حياتكم إنتوا الإثنين مش هتستقيم من

غير ما ترجعوا لبعض .

بكت فريدة بحرقة ، وقالت : أنا عمرى ما حبيت حد غيره ، وسامحته من يوم ما طلقنى ، مقدرش أنام ليلة وأنا ز علانة منه ، هو غلط فى حقى صحيح ، بس أنا عارفة إنه إنسان طيب ، وقبل ده كله هو حب حياتى ، سامحنى إنت يا جمال ، غصباً عنى اللى بيحصل ده .

جمال : يافريدة جوازنا من بعض كان هيبقى أكبر غلطة نرتكبها فى حقنا وإنتى بتحببيه بالشكل ده ، ربنا يوفقكم وتعيشوا حياة سعيدة .

ثم خرج جمال من الشقة ، وتركهما ، ودخلت فريدة على آدم فى غرفة الجلوس ، فقال آدم : هو جمال راح فين ؟ .

فريدة : جمال فسخ الخطوبة ، بعد ما عرف إنى لسه بحبك .

آدم : هو إنتى لسه بتحبينى ؟!!!!

هزت فريدة رأسها برقة ، وقالت : أيوه ياغبى ، لسه بحبك ، عمرى ما حبيت حد غيرك ، ولا هاقدر أحب حد غيرك .

قام آدم ، وأمسك بيدها وقبلها ، وقبل جبينها .

ثم خرجا من الشقة ، وذهبا للمعلم سالم ، فأعطاه آدم المال وأخذ إيصال الأمانة ، ثم سارا متجهين للمأذون ، حتى يتزوجا مجدداً ، وهما يمسان بأيدي بعضهما البعض ، أمام أنظار المعلم سالم ، والذى كاد أن ينفجر غضباً .

إنه الحب يأسادة ، لن تستطيع أن تفسده خبائث الشياطين ، ولا أخطاء المحبين
، فعلاً .
إنه الحب .

آشماڊاي

عند منتصف الليل ، في أحد الأحياء الشعبية ، يسير سليم في الحارة عائداً من عمله ، فيجد أمامه البلطجي عطا .

فيقول عطا :- إنت جاي منين ياض ؟.

- جاي من شغلي يامعلم عطا .

- أنا نبهت كذا مرة على الكل ، مشوفش كلب في الحارة بعد نص الليل ، حصل ولا ما حصلش .

- حصل يامعلم ، بس على ما خلصت ورديتي في المصنع ورجعت .

فصفعه عطا على وجهه ، وصرخ قائلاً :- إنت بتترد عليا ياروح أمك ، كلامي يمشي على كل اللي في الحارة ، كبير وصغير ، يلا غور في داهية ولو كررتها تاني هاشقك نصين وأخلي أمك تترحم عليك .

إنصرف سليم وعاد لبيته ، ودخل ليجد زوجته سمية تنتظره خائفة ، وقالت :- إيه اللي أخرك كده ياسليم ، إنت مش عارف عطا واللي ممكن يعمله ، أنا ميتة من الرعب من بعد ما الساعة عدت نص الليل .

- ماهو قابلني .

- يالهي ، عمل معاك حاجة ؟.

سليم بأسى :- ضربنى بالقلم على وشى ، وهددنى لو إتكمرت هيموتنى .
- الحمد لله إنها جت على قد كده ، وغلاوتى عندك ياسليم ، وغلاوة إبننا اللى
طلعنا بيه من الدنيا ، ما تتأخر تانى ، إحنا يا أخويا مش قده .
- لحد إمتى هنستحمله ، دا لازم له وقفة .

- مين بس اللى هيقف له ، أديك شايف اللى وقفوا له قبل كده ، عمل فيهم إيه ،
موتهم ، ومخدش فيهم يوم واحد حبس ، ولو إتحبس مراته ألغن وأضل ،
والنبى ياسليم خاينا ماشيين جنب الحيط ، ونربى إبننا ، قوم يلا أنا جهزت لك
العشا .

وتناول سليم العشاء مع زوجته ، ودخل غرفة نومه وإستلقى نائماً .
ومرت الأيام والشهور ، وعطا مازال بجبروته ، وفى أحد الليالى إستيقظ سليم
على صراخ إبنه .

- مالك يا حبيبى ؟ .

- وجع فى بطنى يا بابا .

فقالت سمية :- أعمله حاجة دافية يشربها .

- إعملى .

أحضرت سمية كوباً من النعناع وأعطتها لإبنها ، ولكن الألم لم يهدأ ، فقال

- سليم :- إحنا لازم ناخد الولد ونروح المستشفى .
- وعطا ياسليم .
- يعنى نسيب الولد يموت ؟.
- حكم القوى .
- أنا هاخده وأروح المستشفى واللى يحصل يحصل .
- وحمل سليم ولده وخرج متجهاً للمستشفى ، وما أن خرج من بوابة البيت حتى قابله عطا ، فقال :- أنا مش قلت محدش يخرج بعد نص الليل .
- الواد تعبان يامعلم ، وأنا رايح بيه المستشفى .
- مفيش خروج يعنى مفيش خروج ، إرجع ياسليم أحسنلك .
- فرجع سليم مضطراً ، ولكن لم تمر دقائق قليلة ، إلّا والألم يزداد بالطفل ، فحملة سليم مرة أخرى وخرج ، فقابله عطا ثانية :- إنت إيه ؟، حمار ما بتفهمش .
- فصرخ سليم في وجهه :- إنت اللي معندكش رحمة الولد بيموت .
- ما يموت .
- أنا رايح بابنى المستشفى وأخرك هاته .
- إنت بتتحدانى يا ض .

وإنهال عطا ضرباً في سليم ، وإبنة على يديه يصرخ من الألم والخوف ، حتى سقط الولد من يد أبيه ، وعطا يكيل اللكمات لسليم ، حتى إنهار من قوة الضرب ووقع على الأرض بجانب إبنة ، وسمية تصرخ من الشباك ، وتستغيث أن ينقذ أحد زوجها وإبنها .

فوضع عطا قدمه على رأس سليم الملقى على الأرض ومضرباً بدمائه ، وصاح قائلاً :- دا جزاء اللي ما يسمعش كلامي ، أما اللي يتحداني بقى ده جزاءه .

وأخرج مطواته وذبح سليم ، وتركه يسلم الروح ، وأما الولد فقد انفجرت الزائدة الدودية في بطنه ، ومات ولحق بوالده .

خرجت سمية من بيتها تصرخ باكية ، واحتضنت زوجها وإبنها ، وهى تقول :- ربنا ينتقم منك يعطا وأشوف فيك يوم .

ولم يستطع أحد من سكان الحارة أن يشهد ضد عطا ، حتى بعد أن قبضت عليه الشرطة على ذمة التحقيق ، كانت زوجته توحه تهدد أهالى الحارة بأن من يشهد ضد زوجها سوف تقتله هو وأسرته ، حتى أنهم منعوا سمية أن تتلقى العزاء في زوجها وإبنها .

سمية تجلس في شقتها ، وفى يدها كتاباً قديماً له غلاف من الجلد عليه آثار الزمن ، فتضع الكتاب على الطاولة ، وتتنظر أمامها وتقول :- أنتقم ، عايزة

آخذ تار جوزى وإبنى ، وبعد كده هأنفذ كل طلباتك .

ومرت الأيام ، وفى إحدى الليالى عاد عطا لمنزله ، ووجد توحة متزينة للقاءه ، فقال :- إحنا ليلتنا بيضة ولّا إيه ؟.

ضحكت توحة وقالت :- ليلة قشطة .

ودخلا غرفة النوم ، وداعبها عطا ، وأغمضت توحة عيناها من النشوة ، ثم فتحت عيناها ، وصرخت فجأة في رعب ودفعت عطا عنها .

- فيه إيه ياتوحة ؟! ، مالك يابت ؟!!!.

- لما فتحت عينى شفت سليم ، هو اللى .. ، اتخضيت .

- سليم مات ، وأنا قتلتة قدام عينك ولّا نسيتى .

- آه .

- طيب هنكمل ولّا إيه ؟.

- هنكمل ، تعالى .

وفتحت ذراعيها وأخذته فى أحضانها ومارسا الحب .

وفى الصباح التالى ، إستيقظت توحة وقد غادر عطا لبعض أعماله ، ودخلت

الحمام لتستحم ، وبعد أن خلعت ملابسها ، ووقفت تحت الدش تغيرت المياه إلى دماء ، فأصابها الرعب من منظر الدماء ، وإشتعلت النيران في الحمام ، فخرجت عارية من الحمام وهي مرعوبة ، حتى أصبحت في وسط الحارة ، كما ولدتها أمها وهي تصرخ :- حريقة ، حريقة .

فاندفع أهالي الحارة نحوها ، وسترتها إحدى نساء الحارة ببعض الملابس ، ودخل بعض رجال الحارة للمنزل ليطفئوا الحريق ، ولكن لم يكن هناك أثراً لحريق ولا دماء ، وعادوا للحارة ، وقال أحدهم :- مفيش حريقة ولا حاجة ياست توحة .

- إزاي دا النار كانت مولعة في الحمام .

ودخلت توحة منزلها ، وعاد عطا مسرعاً بعد أن علم بما حدث ، ووجد توحة تجلس في الصالة ترتعد وقد شحب وجهها ، وقال :- إيه اللي حصل ياتوحة ؟ .
- بعد ما صحيت من النوم ، دخلت الحمام أستحمي ، لقيت الدش بينزل دم ، فقفلت الحنفية ، قامت النار طالعة من كل حة في الحمام ، أنا خايفة يعطا ، دا عفريت سليم .

- عفريت إيه يابت ، ما عفريت إلا بنى آدم .

وقام ودخل الحمام ، ولا أثر لدماء أو حتى علامات حريق .

- الحمام مفيهوش حاجة ، هي سيجارة البانجو اللي شربناها إمبارح اللي عملت

فيكى كده ، دماغك خفيفة .

وضحك وضحكت توحة .

وبعد يومين ، إستيقظ عطا من نومه على صوت حركة في الشقة ، فخرج من غرفة النوم فرأى خيلاً يمر أمامه ، فصرخ رعباً ، وإستيقظت توحة على صوته ، وقالت :- مالك يعطا ؟! .

- سمعت صوت في الشقة ، قمت أشوفه إيه ، لقيت خيال عدى من قدامى .

وبحثا في أرجاء الشقة ، فلم يجدا شيئاً وعادا لنومهما .

بعد عدة أيام ، وأثناء تناول عطا وتوحة لطعام الغداء ، سمعا صراخ إبنهما ، فهرولا نحوه ليجدا الولد يجلس مدهولاً على السرير وينظر للحائط ويصرخ ، فنظرا نحو الحائط ولم يريا شيئاً ، فسأل عطا إبنه :- مالك يابنى فيك إيه ؟! . فأشار الولد بسبابته نحو الحائط ، وقال :- سليم وإبنه .

ثم دخل الولد في نوبة من التشنجات وفقد وعيه ، فحمله عطا وتوجه به نحو الطبيب الذى فحص الولد ، وقال أنه أصيب بصدمة عصبية نتيجة خوفه من شيء ما ، ونصحهم بتوفير جو مريح للولد .

وتكررت نوبات الرعب للولد ، وفقد القدرة على الكلام ، وكلما تصيبه النوبة يشير نحو الحائط في غرفته .

وفى أحد الليالى ، وبينما عطا وتوحة جالسان فى الصالة يشاهدا التلفاز ، وإذا بباب غرفة الولد يفتح من تلقاء نفسه ، وإبنهم يخرج من الغرفة يزحف على بطنه ويداه مرفوعتان كأن أحداً يسحبه ، فصرخا من الرعب وذهبا نحو الولد ولكن شيئاً ما دفعهم وألقاهم أرضاً ، فأمسك عطا بقدمي إبنه ، ولكن الولد ظلّ

يُسحب ، حتى وصل للبلكونة ، ورُفع فى الهواء وألقى به من البلكونة ، ووقع فى الحارة ميتاً ، مع صراخ عطا وتوحة .

مر شهرين ، وأحست توحة بعلامات الحمل ، وذهبت لطبيب النساء الذى أكد حملها ، ومرت شهور الحمل حتى إقتربت ولادتها ، فذهبت للطبيب للمتابعة وتحديد ميعاد الولادة ومعها عطا .

فحصها الطبيب بالسونار ، وقد ظهرت على وجهه علامات الدهشة ، فقال عطا :- فيه إيه يادكتور ؟!.

- حاجة غريبة ، أول مرة أشوفها ، مفيش جنين فى الرحم ، مع إن نبضه مسموع .

- يعنى إيه ؟!، أومال بطنها المنفوخة دى إيه ؟!، إتأكد يادكتور .

فحصها الطبيب ثانية ، وقال :- إحنا نعملها إختبار حمل .

وظهرت نتيجة إختبار الحمل إيجابية ، فقال الطبيب :- تقريبا السونار عندى

عطلان ، عموماً أنا هاولدها الأسبوع الجاى زى النهاردة .

وخرج عطا مع زوجته من عيادة الطبيب ، الذى فحص بعض مرضاه من النساء ليجد السونار يعمل كما ينبغي ، ثم إتصل بمهندس الصيانة ، الذى أتى وفحص الجهاز جيداً ، وأخبر الطبيب بأن الجهاز سليم تماماً ، وسط ذهول الطبيب .

مر الأسبوع وأتى يوم الولادة المنتظر ، وذهبت توحة مع زوجها للمستشفى ودخلت توحة لغرفة الولادة ، وهى تصرخ من آلام الطلق ، والطبيب ينتظر الجنين ليسحبه ، وجحظت عيناه من الدهشة ، فبدلاً من نزول الجنين نزلت كتلة كبيرة من الدم المتجلط ، وهى تنبض ، وعليها رسم لوجهى رجل وطفل والطبيب يحوقل :- لا حول ولا قوة إلا بالله .

أما توحة ، فارتسمت على وجهها علامات الرعب وهى تنتظر أمامها وتقول :- أنا ماليش ذنب ، عطا هو السبب ، أنا ماليش ذنب .

وشهقت شهقة قوية وماتت ، ومازالت علامات الفزع على ملامح وجهها بعد الموت .

وعاد عطا لمنزله بعد أن دفن زوجته وفتح باب الشقة ، ليجدها مليئة بالغربان وفى وسطها طيفاً لسليم وإبنه ، وما أن رآته حتى بدأت بالنعيق وهجمت عليه

، تنقره بمناقيرها في كل جزء من جسمه حتى فقأت عينيه ، وخرج هارباً من الشقة يتحسس طريقه ، والدماء تسيل من عينيه ومن جسده حتى وصل لوسط الحارة ، في نفس المكان الذي قتل فيه سليم ، وأعين أهل الحارة تنظر إليه في ذهول ، وهو يصرخ :- إرحمنى ، إرحمنى .

والناس تنظر إليه ولا يرون مع من يتحدث ، وفي لحظات الألم والذهول والخوف تلك ، أخرج عطا مطواته من جيبه ، وذبح نفسه وإستمر يحز رقبتة بالمطواة ، وكأن أحداً يمسك بيده ويذبحه ، حتى خر على ركبتيه والدماء تخرج من رقبتة كالنوافير ، وسط صراخ جميع الأهالى .

في شقة سليم تجلس سمية على الأريكة ، وأمامها الكتاب القديم ، مستمتعة بصراخ أهل الحارة ، وهم يصيحون ، عطا قتل نفسه .

وفُتِح باب الشقة بعنف من تلقاء نفسه ، وهبت ريح قوية منه كأنها عاصفة ، لتجد سمية أمامها شخصاً في صورة سليم ، وهو صامت ، فتقف وتقول :- وفيت بوعدك معايا ، وأخذت بتارى ، وأنا كمان هاوفى بوعدى معاك .

ثم مشت تتمختر نحو غرفة النوم ، ودخلت وتركت الباب مفتوحاً ، وخلعت جميع ملابسها ، ثم إستدارت ونظرت إليه ، وقالت :- تعالى ياسليم أنا ملكك الليلة .

ومدت ذراعيها نحوه ، فتقدم نحوها وإحتضنها ، وقد إحمزت عيناه كأنها النار

وتغير شكله وأصبح قبيحاً له جسد حيوان وثلاثة رؤوس ، رأس خروف ورأس
بقرة ورأس إنسان تنفث لهباً ، وصاح بصوتٍ غليظ ، دوى صداه في أرجاء
الغرفة :- أنا إسمى آشماداي ، ملك الجن وإبن إبليس .

المعاش

فتح يونس الدولا ب ، وأخرج بدلته السوداء ليرتديها ، ويحضر بها حفل زفاف ابنة صديقه مصطفى .

ولكنه لم يعثر على الكرافت النبيتى ، وزوجته فادية ليست بالمنزل لتخبره أين يجدها .

وبعد بعثرة فى محتويات الدولا ب وجد الكرافت ، ولكنه عثر أيضاً على شيء آخر .

إنها ورقة ، إعلام من المحكمة مُرسَل إليه ، بتاريخ قديم ، من سبع سنوات .
قرأ يونس الورقة ودُهل مما فيها ، وطبقها ووضعها فى محفظته ، وأكمل لبسه وخرج ليحضر الزفاف .

فى حفل الزفاف لاحظ مصطفى أن يونس يبدو مهموماً ، فجلس بجانبه وقال له :- مالك يا يونس ، شكلك متغير ليه .

- مفيش حاجة .

- يابنى عليا ، دا أنا حافظك ، مالك ؟ ، أقولك ، أخلص فرح البنت ونقعد مع بعض وتحكىلى مالك .

وبعد انتهاء الزفاف جلس يونس مع صديقه فى أحد الكافيهات ، وقال مصطفى

- قولى بقى مالك .

فأخرج يونس الورقة من جيبه وأعطاهها لمصطفى ، أمسك مصطفى الورقة وقرأ ما فيها ، وتعجب ، وقال :- ياخبر ، إيه ده ؟ ، اللى فى الورقة دا حقيقى يايونس ؟!!

- دا إعلام رسمى من المحكمة زى ما إنت شايف .

- فادية إزاي تعمل كده ، ترفع عليك قضية خُلع ، بعد العشرة الطويلة دى ، والعيال اللى بينكم ، دا عيالكم كبروا وقربوا يتجوزوا ، وطول عمركم كويسين مع بعض ، إيه اللى حصل بس ؟! ، وازاي هي تعمل كدة ؟ .
- إنت أخذت بالك من التاريخ .

نظر مصطفى فى الورقة مرة أخرى ، وقال :- دا من عشر سنين .
- أيوه .

- ما تكونش زعلتها فى الوقت ده ، وإنت عارف الستات مجانين ، وعملت ده وبعدين رجعت لعقلها .

- لا عمرى ما زعلتها لدرجة إنها تفكر تعمل كده ، أنا هأتجنن ، ومش عارف أعمل إيه ؟ .

- إنت صارحتها وسألتها .

- أنا لسه شايف الورقة قبل ما آجى فرح بنتك ، لقيتها في الدولاب وأنا بأدور على الكرافت .

- طيب شوف ، أنا ابن خالتي محامى بكرة الصبح هأكلمه وأديله الورقة دى يكشف عنها في المحكمة ، ونعرف أصل الحكاية إيه ، وإنّت ما تتكلمش مع فادية في حاجة لحد ما نعرف الموضوع كله ، واتعامل عادى في بيتك كأنك ما تعرفش حاجة .

- ماشى .

عاد يونس لمنزله وكأن شيئاً لم يكن ، وفي عصر اليوم التالى إتصل به مصطفى ، واتفقا على اللقاء في أحد المقاهى بعد صلاة العشاء .

ذهب يونس للمقهى ، وطلب فنجان من القهوة ، وما أن أخذ رشفة من القهوة ، حتى لمح مصطفى قادماً نحوه وهو متجههم الوجه .

سحب مصطفى أحد الكراسى وجلس عليه .

- فيه إيه يامصطفى ، إنت عرفت إيه عن الموضوع بتاعى ؟.

- ابن خالتي كشف عن القضية ، فادية رفعت القضية من عشر سنين فعلاً ، وكسبتها ، وهى مش على ذمتك من وقتها .

- ازاي كده ، أنا ما استلمتش الإعلام بتاع القضية .

- المُحضر كان ببيجى على بيتك ، وهى بتستلم إعلام القضية مكانك ، وبما

إنك مكنتش بتحضر الجلسات لا إنت ولا محامى تبعك ، المحكمة حكمت لها بالخلع .

- بقالها عشر سنين مش على ذمتى ، وعاشة معايا ، دا أنا كنت بأعاشرها معاشرة الأزواج ، وبنتنا الصغيرة عمرها ست سنين ، جت من حرام ، وعيشتى معاها كلها حرام فى حرام .

- إهدى يايونس .

- أهدى إزاي ، دا أنا هأتجنن ، ليه تعمل فيا كده ؟.

- لازم تهدى ، علشان نعرف الحقيقة .

- هو بعد اللي حصل ده فيه حاجة فى الدنيا إسمها حقيقة ، أنا خلاص مش عارف حق من باطل .

- إحنا نروح عندك البيت ونقعد معاها ونعرف كل حاجة .

- لا ، أنا اللي هاروح لوحدى .

- يا صاحبى لازم أكون معاك ، إنت مش فى حالتك الطبيعية وأخاف تتهور وتعمل فيها حاجة .

- لا ما تخافش ، بعد اللي عملته ما تستاهلش اضيع نفسى بسببها ، أنا عايز بس أفهم ، وبعد كده هي معدتش تلزمنى .

قام يونس و عاد لمنزله ، واستقبلته فادية بابتسامتها المعهودة والتي تعودت أن تقابله بها دوماً .

دخل يونس لغرفة النوم وخلفه فادية وجلس على كرسى التسريحة ، ووقفت فادية أمامه ، وقالت :- مالك يا يونس ؟.

نظر لها يونس بصمت ، وأخرج الورقة من جيبه وأعطائها لها .

نظرت فادية للورقة وقد عرفتها ، وتمنت لو أن الأرض تبتلعها ، ولم تستطع قدماها أن تحملها ، فجلست على طرف السرير .

مرت عليها لحظات من الصمت ، وقلبها يكاد يتوقف من نظرات يونس لها ، خاصة أنه لم ينطق بكلمة .

استجمعت فادية قواها ، أو هكذا أقنعت نفسها ، ثم قالت :- إنت أخذت بالك من تاريخ الإعلام ؟.

- آه ، من عشر سنين .

ثم إستطرد بعصبية :- فى حرام .

- إنت فاكّر إيه حصل من عشر سنين .

- لا مش فاكّر ، فكرينى .

- بابا مات من عشر سنين .

- وإيه علاقة موت أبوكى باللى حصل ده ؟.

- هأقولك .

إبتلعت فادية المتبقى من ريقها بعد أن جف حلقها ، وقالت :- إنت عارف إن ماما ماتت قبل بابا بسنتين ، ولما مات الله يرحمه معاشه اتوقف ، ففكرت إن إحنا أولى بالمعاش ده ، رفعت قضية خلع ، ولما كان المحضر ببيجي هنا كنت أنا اللي بأقابله وإنت في شغلك ، لحد ما المحكمة حكمت بالخلع لأنك محضرتش ولا جلسة .

ضحك يونس ضحكة حزينة وقال :- إحنا أولى بالمعاش ، قبلتى على نفسك مال حرام ، وعشرة حرام .

- الفلوس دى حقى .

- حقك ؟!!! ، إنتى لسه بتقاوحى ، لا يامدام ، دا مال حرام ، وبنتك الصغيرة جت في الحرام .

- أنا مراتك قدام ربنا وقدام الناس .

- مراتى ازاي وانتى خلعتينى بحكم قاضى ، هانت عليكى كل حاجة ، حبنا وبيتنا وعشرتنا الطويلة ، علشان إيه ألف جنيه ولا ألفين ولا حتى عشرة ، فلوس الدنيا كلها عمرها ما تكون تمن لده كله .

- أنا عملت كده علشان بيتنا وولادنا .

- وقبلتى إزاي تسيبي لولادك فلوس حرام ، مش فارقة دا إنتى عاشرتينى في الحرام ، أنا معدش ليا مكان في البيت ده .

وأخرج ورقة من جيبه وأعطاهها لها ، وقال :- أنا كنت كتبت الشقة بيع وشرا بإسمك بعد وفاة والدك من عشر سنين ، إتفضلى دا العقد ، وأنا أول كل شهر هأجى علشان أشوف الأولاد وأسيبك مصاريفهم .

بكت فادية بحرقة :- هتسيبنى ؟.

- إنتى اللى سبتينى .

ثم قام يونس بحزم ملابسه في حقيبة ، وفادية تتوسل إليه ألا يرحل ، حتى إنتهى وأغلق الحقيبة وخرج متوجها نحو باب الشقة ، ودمعات فادية وتوسلاتها من خلفه .

فالتفت إليها باكياً ، وقال :- مبروك عليكى المعاش يا أم عيالى .

عفریت مصباح

مصباح ، شاب وحيد ، مقطوع من شجرة ، يعمل عامل نظافة بأحد الشركات الصغيرة ، ويتقاضى راتب ضئيل ، بالكاد يكفى طعامه ، وإيجار الغرفة التي يؤجرها فوق سطوح إحدى العمارات القديمة .

و ذات يوم ، بعد أن عاد من عمله ، إنقطعت الكهرباء عن غرفته ، وبعد دقائق قليلة جاءه مالك العمارة وطرق الباب .

مصباح : مين ؟.

- أنا منير صاحب البيت .

فتح مصباح الباب ، وفوجئ بأن كل أنوار العمارة مضاءة إلا غرفته ، فقال :-
إتفضل ياأستاذ منير ، خير !!.

- أنا قطعت الكهرباء عن أوضتك .

- ولیہ کدہ ؟!!!..

- علشان إنت مش بتدفع فى فاتورة الكهرباء بتاعت العمارة .

- ما أنا بادفع لحضرتك الإيجار كل شهر .

- آه ، لكن الكهرباء لا ، وفواتير الكهرباء بقت غالية ، ناالر ، ومن الآخر هتدفع

هاوصلك النور تانى ، ما دفعتش ، مفيش نور .
ثم ترك مصباح وانصرف ، ودخل مصباح غرفته وأغلق عليه بابه ، وجلس
فى الظلام .

بعد قليل ، طرق الباب ثانيةً ، ففتح مصباح الباب ، ووجد أمامه زميله فى
العمل طارق ، قد أتى لزيارته .

- إيه يابنى ، قاعد فى الضلمة ليه ؟ .

- النور قطع .

- نور إيه اللي قاطع ، دا العمارة كلها منورة .

- صاحب البيت قطع عنى النور علشان ما بدفعش فى فاتورة الكهرباء .

- ولا يهمك ، أنا عندى لمبة جاز قديمة ، بتاعت أبويا ، هأجيبها لك ، وإنت كده
كده معندكش لا تلفزيون ولا غيره ، مش محتاج أكثر من النور .

ثم خرج طارق ، وذهب لبيته القريب من سكن مصباح ، وأحضر اللمبة ،
وأعطاها لمصباح .

فقال مصباح : اللمبة دى شكلها غريب كده ليه ؟! .

- أيوه ، لمبة نحاس قديمة من أيام جدى ، بس حلوة ، إنت بعود كبريت تولع
الفتيلة تنور لك الأوضة ، بس هى عايزة شوية نضافة ، نص لمونة هتلاقيها

بتلمع .

ثم إنصرف طارق ، وفتح مصباح باب غرفته ، وجلس يلمع اللمبة فى ضوء سلم العمارة الخافت .

وفجأة ، هبت رياح قوية كأنها عاصفة ، فتحت نافذة الغرفة ، وبعثرت محتوياتها ، ثم خرج من اللمبة شعاع من النور يصحبه دخان كثيف .

خرج من اللمبة عفريت ضخم ، فألقاها مصباح ، وهمّ هارباً ، لكن العفريت أغلق باب الغرفة دون أن يلمسه ، وقال :- ما تخافش يامصباح ، أنا مش هأذيك ، أنا عفريت اللمبة وإنت دعكتها ، وبكده ليك عندى تلت أمنيات أحققها لك ، تطلب إيه ؟.

- أنا عمرى ما كان عندى أمنيات .

- هو فيه حد يابنى معندهوش أمنيات ؟!!.

- أنا ، طول عمرى ، وماشى جنب الحيط ويمكن كمان جوه الحيط .

- طيب ياسيدى ، أنا ظهرتك أهه ، إتمنى .

- مفيش فى نفسى حاجة .

- يابنى ما تغلبنيش ، أنا خلقى ضيق .

- طيب إدينى فرصة أفكر .

- إتفضل .

وجلس العفريت على الأرض ، ووضع يده على خده وهو ينظر لمصباح ،
الذى يمشى فى الغرفة جيئةً وذهاباً .

وبعد مرور عدة ساعات ، على هذا الحال ، صاح العفريت :- ما تخلص بقى
، النهار قرب يطلع .

- خلاص ، أنا عايز الصحة .

العفريت بغضب : صحة إيه ؟!!! ، يابنى الصحة دى بإيد ربنا ، وبعدين ما
إنت زى البغل أهه ، صحة إيه اللى عايزها ؟.

- طيب ، أقولك ، أنا عايز أعيش بكرامة ، مش عايز أتهان .

- مش إنت مصرى ؟.

- أبأ عن جد .

- تبقى عارف إن الإهانة شئ عادى عند المصريين ، إيه الجديد بقى ، وإنت
لو مكننتش مصرى كنت قلت ماشى ، يابنى ما تدخلناش فى السياسة ، الله
يخرب بيتك هتودينا فى داهية .

- يبقى اتمنى تشغلنى فى وظيفة كبيرة .

- وظيفة ؟!!! ، إذا كنت أنا أساساً عاطل ، كنت نفعت نفسى ، شوفلك أمنية

تانية ، وخلصنى بقى .

- طيب ، إدفع فاتورة الكهرباء ، علشان صاحب العمارة يرجعلى النور .

- هو حد قالك إنى محافظ البنك المركزى وّلا رجل أعمال ، فواتير الكهرباء بقت نار ، وأنا عفريت من محدودى الدخل .

- أنا زهقت ، شوف إنت بقى تقدر تعمل إيه .

ثم همهم مصباح : إيه النحس ده ، عفريت من محدودى الدخل ؟!! ، هو أنا طلعلى عفريت من كينيا .

العفريت : بتقول إيه ؟.

- ما قلتش ، شوف حضرتك عايز تعمل إيه .

- إيه رأيك ؟ ، أفسحك فى حديقة الفسطاط ، وأغديك غدوة حلوة ، وأشربك سطل خروب ، ويبقى دول الأمنيات بتاعتك واتكل أنا .

مصباح متعجباً : الفسطاط ؟!!! ، سطل خروب ؟!!! ، هو إنت منين ؟.

- من الدويقة ، ليه ؟.

- مفيش ، يلا بينا .

وخرجوا وذهبوا لحديقة الفسطاط ، وعزم العفريت مصباح على الغذاء على عربية فول ، وبعدها سقاه سطل الخروب .

وبعد غروب الشمس ، عادا لغرفة مصباح ، وقال العفريت :- خد يامصباح ، أنا هأسبلك اللمة تنور بيها الأوضة ، لحد ما تدفع فاتورة الكهرباء والنور يرجع .

- بس دى فاضية ، مفيهاش جاز ، إملاها بقى .

العفريت بعصبية : إنت عارف لتر الجاز بقى بكام ، إملاها إنت ولا اخدها معايا ، وخليك قاعد فى الضلمة .

- خلاص ياعم ، سيبها وكتر خيرك .

خرج العفريت من الغرفة ، وهو يضرب كفاً بكف ، ويتمتم :- لا حول ولا قوة إلا بالله ، دا مفكرنى عفريت من التجمع الخامس ولا الشيخ زايد ، أستغفر الله العظيم يارب .

الغلبان

فى إحدى شركات السىاحة بالقاهرة ، ىدخل صابر ، سائق الشركة ، مكتب المدير :- صباح الخير يا أىمن بيه .

- صباح النور ياعم صابر ، خير .

- فى شاب جارى ، دماغه على قده ، لو ممكن نشوف له شغلانة هنا فى الشركة بتقول دماغه على قده ، معاق ذهنيأ يعنى ؟.

- يعنى شوية ، بس هو واد غلبان ، وإخواته طردوه من بيت أهله ، تصدق يابيه راحوا حطوله ثلاثين ألف جنيه فى البنك وقالوله دا نصيبك فى الورث ، وطرده ، والله يابيه ظروفه وحشة ، أنا سكنته فى أوضة على السطح .
- وده هنشغله إيه هنا ؟.

- يشتغل ساعى فى الأوفيس ، وأهو نكسب فيه ثواب .

- ماشى ياعم صابر ، إسمه إيه ؟.

- محمود .

- هاته بكرة ، وخليه يجيب بطاقته .

- ألف شكر يا أىمن بيه ، ربنا يجزيك خير .

وفى اليوم التالى ، أحضر عم صابر محمود لمقر الشركة ، ودخل على أيمن مكتبه ، وقال :- هو دا محمود اللى كلمتك عنه إمبراح ، يا أيمن بيه .

- ماشى ياعم صابر ، خد بطاقته واديهها لشئون العاملين ياخدوا صورة منها ، وخليه يستلم شغله فى الأوفيس .

- ربنا يكرمك يا أيمن بيه .

وإستلم محمود عمله فى الأوفيس ، وعلم كل موظفى الشركة بظروفه ، وعطفوا عليه ، وخاصة مي موظفة حجز تذاكر الطيران .

ومرت الشهور ، ومحمود يزداد تعلقاً بها ، فى الصباح ينتظر بجوار موظفى الأمن حتى تأتى ، وما أن تدخل الشركة ، يسرع خلفها ليلبى كل طلباتها ، ولا يتأخر عن شيء تريده ، ومن ناحيتها كانت تحنو عليه ، ومن وقت لآخر تحضر له شيئاً ، كبعض الملابس .

ولاحظ سعد موظف الأمن ذلك ، وفى صباح أحد الأيام بعد أن حضرت مي لمقر الشركة ، قال لمحمود :- إيه يامحمود إنت بتحب الأستاذة مي ؟.

- أوى .

- وهى كمان بتحبك .

- بجد ؟!!!.

- آه يابنى ، إنت مش واخد بالك من ، مرة تشتريك قميص ، ومرة بنطلون ،

وحاجات تانية ، نفسك تتجوزها .

- آه ، بس مكسوف أكلها .

- أنا هاأكلها ، بس تجيبها هدية إنت كمان .

- أنا مش بأعرف أشتري هدية .

- ولا يهملك ، هات متين جنيه ، وأنا أشتريها هدية حلوة ، وأقولها محمود اللي جابها .

فأعطاه محمود المال ، وتكرر الموقف من سعد ، يأخذ من محمود المال ويوهمه أنه يشتري هدايا لمي ، خاصةً بعد أن علم بمبلغ الثلاثين ألف جنيه المودعين في البنك .

أما مي فما زالت تعطف عليه ، وكلما تعطف يزداد عطفها على محمود ، يعتقد أنه حياً .

وفى أحد الأيام ، قال سعد لمحمود :- مي بتقول هو محمود مش هيخطبنى رسمي بقى ، ويجيبلى شبكة ، معاك فلوس ؟ .

- آه ، ثلاثين ألف جنيه في البنك .

- معقول ، يدوب يجيوا الشبكة ، بكرة الصبح تروح البنك وتجييهم ، علشان أروح أشتريك الشبكة وتقدمها ليها .

وفى مساء ذلك اليوم أخبر محمود عم صابر بحبه لمي ، وأنه يريد أن يتزوجها ، وأنه يعطى مالا لسعد ليشتري لها هدايا ، وأنه من الغد سيذهب للبنك ليسحب المال ليشتري لها الشبكة ، فقال صابر :- دا بينصب عليك يابنى ، يا محمود إنت فين وهى فين ، يا حبيبى إنت على قد حالك ، لا معاك شهادة زيتها ولا هتقدر تشتريها شقة ولا عفش .

- أنا بحبها يا عم صابر ، وبكرة هاجيب الفلوس من البنك وأشتريها الشبكة .
صمت صابر للحظات ، وقال :- طيب بأقولك إيه ، ما تسحبش الفلوس بكرة ، وأنا هأتكلم معاها هأشوفها عايزة شبكة بكام ، وأجى أقولك ، ونروح مع بعض نشترىها ، ماشى يا محمود .

- ماشى يا عم صابر .

وفى صباح اليوم التالى ، ذهب عم صابر لمكتب المدير .

- صباح الخير يا أيمن بيه .

- صباح الخير يا عم صابر ، خير .

- موضوع يخص محمود .

وحكى لأيمن الموضوع برمته ، فقال أيمن :- ومي ليها علاقة بالموضوع ده من بعيد أو من قريب .

- لا يا بيه ، هي كتر خيرها بتعطف عليه من باب الشفقة ، بتجيبله لبس وتديله

فلوس ، بس محمود زى ما إنت عارف دماغه على قده ، وسعد إستغل الفرصة وبينصب عليه ، ودلوقتى لو سكتنا عليه ، هياخد منه الفلوس اللى حيلته في البنك .

- طيب ، شوف ياعم صابر ، خلى الموضوع ده بينا ، مش عايز حد في الشركة يعرف بيه ، وخصوصاً مي ، مش عايزين نسبب ليها إحراج .

- طبعاً يا أيمن بيه .

- روح هات سعد وتعالى معاه لوحدكم .

وذهب عم صابر لسعد وأحضره لمكتب أيمن ، فقال أيمن :- إدخالوا ، وإقفل الباب ياعم صابر .

ثم وقف ، وقال :- إيه ياسعد إنت هنا موظف أمن ولا نصاب ، بتنصب على الواد الغلبان ، ليه تستغله وإنت عارف معاق ذهنيّاً .

- أنا ما عملتش حاجة يا أيمن بيه .

- سيبك من الكلام ده ، من الآخر أخذت من محمود فلوس قد إيه ، أنا عرفت كل حاجة .

نظر سعد للأرض ، وقال :- ألفين جنيه .

تمام ، من دلوقتى ملكش شغل في الشركة ، ياعم صابر تاخده في إيدك وتروح شئون العاملين ، يشوفوا مستحقاته ، ويتخضم منهم الألفين جنيه فلوس محمود

، ولو مستحقاته أقل من المبلغ ، يمضوه على شيك بالمبلغ ، ودا قرار فصله من الشركة .

وأعطى عم صابر ورقة بها قرار الفصل ، فقال سعد :- سماح يا أيمن بيه ، ومش هأعمل كده تانى .

- خلاص يابنى ، الموضوع منتهى ، إتفضل بره .

وتم فصل سعد من الشركة ، وإستعاد عم صابر فلوس محمود ، وذهب للبنك وأودعها في حسابه .

وظل محمود كما هو مع مي ، فهو مازال يحبها ، رغم أنه علم أن سعد كان يستغله ليستولى على ماله .

ومرت الأيام ، حتى أتت مي إلى الشركة ويدها كروت الدعوة لزفافها ، وأعطت محمود كارت ، وقالت :- دا كارت فرحى يا محمود ، لازم تيجى .

وتركته لتدعو بقية زملاءها .

أمسك محمود بالكارت ، وإنهمرت دموعه ، فرآه عم صابر ، وربت على كتفه ، وقال :- مش قلتلك يامحمود ، يابنى إنت من دنيا وهى من دنيا تانية خالص ، بتحبها يامحمود ؟.

هز محمود رأسه في صمت ، فقال عم صابر :- يبقى تفرح علشانها وتتمنالها الخير ، إدعيها ربنا يوفقها وتعيش سعيدة ، الحب يابنى للى زينا بيبقى في

الأحلام بس .

- يارب ياعم صابر تعيش مبسوطة على طول .

- يارب يابنى ، تروح تلبس وتتشييك بقى ، وهافوت عليك بالليل نروح الفرح ونباركلها .

وفى الليل ذهب عم صابر ومعه محمود لقاعة الأفراح ، وتوجهوا نحو العروس ليسلما ويباركها لها ، فقالت مي لعريسها :- دا محمود زميلى فى الشغل ، أطيب قلب وأحسن راجل فى الدنيا .

فابتسم محمود سعيداً بإطراءها فيه .

ثم نظرت لعم صابر ، وإبتسمت إبتسامة فهم معناها ، فقد علمت مي منه بأمر محمود .

ووقف محمود وعم صابر بجوارها وجوار عريسها ، وإلتقط المصور صورة لهم مع بعض ، ورفع محمود يده للسماء ، وقال بصوت عالٍ :- ربنا يسعدك على طول يا أستاذة مي .

وسط ضحكات المدعوين وهم يرددون وراءه :- آمين .

كلب الباشا

كلب الباشا ، طايح جامح فى البلد
عض وهو هوة ، ولا قادر عليه أحد
شاف عيال ، جرى وراهم وعض منهم ولد
راحوا لقصر الباشا ، ما هو ليهم سند
نهرهم ، وقالهم ، مين فيكم أبو الولد
وقاله مين اللى عض ، الكلب ولّا الولد
خاف الاب ، من كرباج الباشا ، لو جلد
قاله ابنى هو اللى عض الكلب ، وما كسد
قال الباشا ، حق كلبى مية من الفلوس عدد
تدفعهم حالاً ، واعتذار للكلب من الولد
دفع الاب الفلوس ، ولا اعترض ولا نقد
ومرت الايام ، والكلب طبعه هو هو ما فقد
كل يوم فى زيادة ، وما هدى ولا همد

مات الكلب ، وقلب الباشا عليه فى كمد
عمله سرادق كبير ، لعزیز علی قلبه فقد
واجب نروح نعزى ، قال شيخ البلد
هزوا روسهم ، وقالوا واجب ، اهل البلد
راحوا عزوا ، وأظهروا للباشا المدد
وبعد يوم ، مات الباشا ، ولا ساب ولد
قالوا كلب ومات ، وما عزى فيه أحد

ملكة البيت

رن جرس الباب ، وقامت هدى لتفتح ، فوجدت أخيها كامل .

- السلام عليكم يا هدى .

- وعليكم السلام ، اتفضل يا كامل .

ثم جلس كامل ، وقامت هدى بإعداد الشاي ، وقدمته لأخيها ، ثم قالت :- مالك يا أخويا ؟ ، وشك متغير .

- مريم بنتى زعلانة مع جوزها ، وجت عندي البيت امبارح ، وعايضة تتطلق ، ومش عارف اعمل ايه ؟.

- لا حول ولا قوة إلا بالله ، طيب وجوزها كلمك .

- أه كلمنى ، بس هى مصممة على الطلاق .

- طيب خليها تجيلى بكرة ، أتكلم معاها ، وأعرف مشكلتها إيه .

- إن شاء الله ، هأقوم أنا وهأبقى أبعثالك بكرة .

وفى اليوم التالى جاءت مريم إلى عمتها .

هدى : إيه يا مريم ، احكىلى بقى إيه مشكلتك مع جوزك .

- زهقت ياعمته من عيشتى معاه ، مضيق عليا فى الخروج ، وبيعير غيره

شديدة ، خنقنى .

- هو مقصر معاكى فى حاجة ، فى مسئوليات البيت ، المصاريف وغيره .

- بصراحة لا ، كل اللى باطلبه بيحييه ، بس أنا عايزة أخرج براحتى وأرجع براحتى ، وأعيش حياتى .

- تعيشى حياتك إزاي ؟ ، هو إنتوا مش بتخرجوا مع بعض تتفسحوا أو تشتروا حاجة .

- بنخرج كثير ، بس أنا أوقات ببقى عايزة أخرج مع أصحابى براحتى ، وإذا خرجت يقوللى هترجعى الساعة كام ، ولو إتأخرت يعمل مشكلة ، آخر مرة رحلت أزور واحدة صاحبتى ، ورجعت الساعة واحدة بالليل ، اتخانق معايا وعمل مشكلة ، علشان كده سبت له البيت ورحلت عند بابا .

- وينفع تتأخرى كده يامريم .

- وفيها إيه ياعمتمو ؟ ، الناس كلها فى الشارع ، عادى يعنى ، هى جت عليا .

- وهو مجاش ياخذك ليه ؟ .

- هو قاللى لو هتتأخرى كلمينى آجى اخذك ، بس أنا رفضت ، يبقى إيه منظرى قدام صاحبتى ، هو عايزها تقول إن جوزى بیشك فىا وفى أخلاقى .

- هو جوزك لما يغير عليكى ويخاف عليكى ، يبقى بیشك فيكى ؟!!

صمتت هدى لحظة ، وقالت :- أنا هأحكليك حكاية ، حكايتي أنا .

- أنا اتجوزت مرتين واتطلقت ، جوزى الأول ، كان مهندس شاب ، أكبر منى بخمس سنين ، وكنا عايشين سEDA ، عندنا عربية ومعانا فلوس ، عيشة مرتاحة يعنى .

وبعد كام شهر من الجواز ، حملت والجنين مات فى بطنى ، وشفت لهفته وخوفه عليا ، بعدها حملت تانى وربنا رزقنا بولد ، وبعدين حصلت مشاكل فى الشركة اللى كان شغال فيها ، وساب الشغل ، واتغيرت ظروفنا المادية ، فقال إنه هيدور على سفر ، وأنا وافقته ، واتفقنا إنه بعد ما يسافر هيظبط أموره هناك ويبعتلى أسافر له ، وبعد ما سافر بفترة قصيرة ، بعثلى علشان أسافر له ، بس أنا رفضت .

أسافر ليه ؟ ، واتغرب ليه ؟ ، وابعد عن أهلى ، هو يسافر ويبعثلى فلوس أنا وابنى ، وبقي يتحايل عليا كتير ، مرة أوافقه وأرجع فى كلامى ، ومرة تانية أعاند وأرفض ، ورغم كل ده رضى بالأمر الواقع .

وعلى فكرة ، كان بيغير عليا جداً ، ويعمل معايا زى جوزك ، الخروج بإذن والرجوع بميعاد ، كان باقى يعمل دفتري حضور وإنصراف .

وهو مسافر ، اخدت راحتى ع الآخر ، أخرج وأرجع بمزاجى فى أى وقت ، لحد ما واحد من بلدنا كلمه ، وقاله مراتك بترجع كل يوم البيت متأخرة ولوحدها .

كلمنى ، ولحق كلمنى بكل هدوء ، أنا إتعصبت ، إزاي يحاسبنى على خروجى ، فقالى اخرجى بس ما تتأخرىش ، ولو إتأخرتى أبوكى أو حد من إخوانك يروح يجيبك من المكان اللى إنتى فيه ، فرفضت وإتعصبت زيادة .

وكانت نتيجة عنادى إننا إتطلقنا ، وراح هو شاف حياته واتجوز ، وبأمانة إدانى كل حقوقى ، ونفقة الولد كانت بتجلى كل شهر بدون تأخير .

وبعد طلاقى بسنتين ، واحد صاحبتى جابتلى عريس ، راجل من الجماعة السلفيين ، اللى بيتجوزوا كتير دول ، وكان متجوز وعنده أولاد كمان ، وعرفت إنه بيتجوز كتير ويطلق ، ومع ذلك وافقت ، لكنه هو اللى اتردد ، فبعته ، تعالى نتجوز ، وأنا راضية بظروفك ، وكل اللى هتطلبه هأعمله ، وكان أول طلب له ، إنه مش عايز إبنى معايا ، ولا حتى عايزنى أشوفه تانى ، وعلشان أرضيه إتنازلت عن حضانة إبنى لطيقى واتخلت عنه .

إتجوزته ، وكان بيحلى مرة فى الأسبوع ، يقعد معايا كام ساعة ويسينى ، وبقيت أخرج وأرجع براحتى ، وأعرفه إنى إتأخرت ، كنت عايزاه يغير عليا ، لكن ما حصلش مكنش فارق معاه ، وبعدين حصل حمل ، فطلب منى أنزله ، وأنا رفضت ، وقلت إزاي دا يبقى حرام ، فكان رده مش ماشى خالص مع دقنه الطويلة ، عارفة قال إيه ؟ .

- إيه ؟ .

- قال لا مش حرام ، مادام فيه عذر قوى .

- قتلته وإيه العذر القوى بقى ، رد وقال :- أنا عندى ولاد ومش عايز أخلف تانى ، وكمان لو كملتى الحمل هأطلقك ، تخربى بيتك بقى علشان الحمل .
- خفت يطلقنى ، الناس هتقول عنى إيه إتطلقت مرتين ، واحنا فى مجتمع بيتعامل مع الست المطلقة كأنها عار .

عملت الإجهاض ، وتفكرى جه معايا عند الدكتور ، أبداً .
وكنت هأموت فى العملية ، وبعد أسبوع لقيته باعتلى ورقة الطلاق ، طلقنى من غير حتى ما يفكر بيحى يسأل عليا أو يشوفنى ، وطبعاً أنا كنت متنازلة عن كل حقوقى من قبل حتى ما نتجوز ، فكان الطلاق سهل جداً بالنسبة له .
بعد الطلاق للمرة الثانية ، بقيت أفكر كثير ، وعملت مقارنات بينه وبين طليقى الأول .

الأول كان بيغير ويخاف عليا ، وأنا أقول دى حاجة تخنق ، والثانى أنا أصلاً مش فارقة معاه أبداً ، حتى فى الإجهاض الأول عمل إيه ، وده عمل إيه .
تنهدت هدى تنهيدة حارقة ، ودمعت عيناها ، وقالت :- دمرت حياتى بإيدى ، وخسرت إبنى ، عارفة بعد ما إتنازلت عن حضانة إبنى ، كان طليقى الأول بيعته يقضى معايا يوم كل أسبوع ، بس والثانى مش موجود ولا يعرف علشان زى ما قتلتك كان رافض إنى حتى أشوف إبنى ، كان بيتضايق من وجود الولد ، وتعرفى طليقى الأول كان مقدر ده ، ومكنش بيسبب لى أى مشاكل .

ودلوقتى بقالى عشر سنين ما شفتش إبنى ، مش راضى بييجى يزورنى ، وكنت ظنيت إن أبوه هو اللى قسّاه عليا ، لكن الحقيقة إن أبوه مالوش ذنب ، ورقة التنازل عن الحضانة وقعت فى إيده وشافها ، وعرف أن أنا اللى إتنازلت عن حضانته علشان أتجوز تانى .

إبنى عرف إن أنا اللى إتخليت عنه ، فاتخلى عنى .

وبكت هدى بحرقة :- فرحه كان الشهر اللى فات ، إتجوز ، ورفض إنى أحضر الفرح ، لكن إن أبوه جه وعزمنى ، وقال هأقعدك فى مكان تشوفيه من غير ما ياخذ باله ولا يشوفك ، ما هو رافض إنى أحضر الفرح ، رحت وشفته جنب عروسته ، من غير ما أخده فى حضنى وأباركله .

قامت مريم واحتضنت عمتها ، وهما يبكيان .

فقالت هدى :- دلوقتى أنا قربت على ستين سنة ، عايشة لوحدى بعد أبويا وأمى ما ماتوا ، وإخواتى كل واحد منهم مشغول بحياته ، بيجوا يسألوا عليا من وقت للتانى ، لكن بقيت وحيدة .

وأكملت :- حافظى على بيتك وجوزك يامريم ، وخدى بالك من بنتك ، وجودها بينكم نعمة ، إنتوا مش حاسين بيها .

قومى إتصلى بجوزك ، خليه بييجى ياخدك وارجعى بيتك ، إنتى ملكة البيت ده ، لو إتخليتى عنه هتلاقى نفسك جارية فى بيت تانى .

إتصلت مريم بزوجه ، وعادت معه إلى مملكتها ، وعملت بنصيحة عمتها ،
وعاشت سعيدة للأبد مع زوجها وإبنتها .

خمسة عشر عاماً

فى مركز الأشعة بمعهد ناصر ، أعطت الممرضة حقنة المادة المشعة لعادل ، تمهيداً لعمل الأشعة المقطعية ، وقالت :- حضرتك هتستنى فى الأوضة اللى جنبنا مع بقية المرضى ، وبعد ساعة هتعمل الأشعة .

عادل : إن شاء الله .

دخل عادل الغرفة ، وكان بها رجل يبلغ من العمر سبعون عاماً ، وفتاة شابة تجلس بجوار امرأة أربيعينية .

لفتت الفتاة إنتباه عادل ، فهى جميلة ورقيقة ، وظل يختلس النظرات إليها من حين لآخر .

لاحظ الرجل العجوز ذلك ، وابتسم وقال :- بما إننا محبوسين مع بعض فى الأوضة دى ، نتعرف بقى على بعض ونرغى شوية .

ثم نظر لعادل وغمز له بعينه ، فابتسم عادل ، وعلم أن العجوز لاحظ نظراته للفتاة .

العجوز : أنا إسمى صابر ، من باب اللوق ، عندى سبعين سنة ، ومريض بسرطان الغدد الليمفاوية .

ثم نظر لعادل :- والأستاذ إسمه إيه ؟.

عادل : إسمى عادل ، من دمنهور ، وعندى سرطان فى الغشاء البريتونى ، وعمرى أربعين سنة .

ثم نظر العجوز للمرأة ، فقالت : أنا إسمى منى من شبين الكوم ، عندى خمسة وأربعين سنة ، وعندى سرطان بالثدى .

ثم التفت للفتاة ، فقالت : وأنا إيمان ، عمرى خمسة وعشرين سنة ، من دمنهور ، وعندى سرطان بالغدة الدرقية .

فابتسم العجوز بخبث ، وقال : وإنتى كمان من دمنهور .

فاستحت إيمان ، ونظرت للأرض .

وظل العجوز يضاحكهم ويلقى عليهم النكات والحكايات ، حتى أشاع جواً من المرح والبهجة فى الغرفة ، وتبادلوا أرقام هواتفهم حتى يتواصلوا مع بعضهم البعض .

وبعد أن إنتهوا من عمل الأشعة ، إنصرف كلاً منهم فى طريقه .

وفى اليوم التالى أمسك عادل هاتفه المحمول ، وظل يقلبه فى يده ، وهو متردد ، أيتصل بإيمان أم لا ، حتى رن هاتفه فجأة ، ووجد إسم إيمان على الشاشة .
- ألو .

- إزيك ياأستاذ عادل ، أنا إيمان اللى كنت معاك فى معهد ناصر إمبراح .

- أهلاً آنسة إيمان ، عاملة إيه ؟.

- الحمد لله تمام ، إنت عامل إيه ؟، أنا حببت بس أطمئن عليك .

- ربنا يعزك ، دا من ذوقك .

- الله يخليك .

- ممكن أبقي أكلمك من وقت للتانى ، أطمئن عليكى أنا كمان .

- طبعا ممكن ، دى حاجة تبسطنى .

وبعد هذه المحادثة ، تكررت الإتصالات بينهما ، وتعددت اللقاءات ، حتى أነع الحب فى قلوبيهما .

ومع مرور الوقت ، تدهورت حالة إيمان الصحية ، وانتشر الورم فى بعض أعضاء جسدها ، وأصبحت تحتاج إلى جراحة عاجلة .

ذهب عادل لزيارتها فى المستشفى ، وكان والديها بجوارها ، فسلم عليهما ، وعرفهما بنفسه ، وعلم منهما بأنه قد تحدد لها موعد للعملية الجراحية فى اليوم التالى .

خرج عادل من الغرفة ، وذهب للطبيب المتابع لحالتها ، وسأله عن وضعها الصحى ، فأخبره بأن حالتها خطيرة ، والأمل فى نجاتها ضعيف ، فعاد إلى غرفتها ، وقال لوالدها : لو سمحت ياعمى ، ممكن كلمتين على إنفراد .

- طبعاً يابنى اتفضل .

وخرج الإثنان من الغرفة ، وقال عادل :- عمى ، أنا طالب إيد إيمان منك ، عايز أتجوزها .

دُهِش الأب ، وقال :- يابنى تتجوزها إزاي ، إنت عارف وضعها الصحى ، أنا مش هأقبل تتجوز بنتى شفقة .

- أنا بحبها ياعمى من فترة طويلة ، وجوازي منها مالوش علاقة بالشفقة ، حضرتك بس إسألها عن رأيها .

- تعالى ندخل نسألها .

ودخل الإثنان الغرفة ، وقال الأب :- ياإيمان ، عادل طلب إيدك منى .

ابتسمت ، وقالت :- هتتجوزنى وأنا كده ؟!! .

- يعنى إيه إنتى كده ، ياريت إنتى بس توافقى عليا ، دا أنا أكبر منك بخمستاشر سنة ، وإحنا بنحب بعض من فترة .

ضحك الأب ، وقال :- إنتوا بتحبوا بعض من فترة ، وأنا طرطور بقى .

وضحك الجميع .

عادل : أنا هاروح أجيب المأذون ، ونتجوز حالياً .

وخرج عادل ليحضر المأذون ، وعاد فى السابعة مساءً ومعه المأذون ووالديه

والشهود ، وقد اشترى لإيمان فستان أبيض للزفاف .

وبعد أن إرتدت الفستان الأبيض ، وتم عقد القران ، قال عادل :- أنا إستأذنت الدكتور علشان نخرج ونعمل زفة ووافق .

تأبطت إيمان ذراع عادل ، وخرجا من المستشفى ، وقد ضجت أركانها بالزغاريد وأصوات التهئة ، وما أن خرجا من المستشفى حتى وجدت إيمان أن عادل قد أحضر أصدقائه وأصدقائها ، وأعد سيارة للزفة مزينة ببوكيهات الورود ، وركبا السيارة وخلفهما الأهل والأصدقاء فى عدة سيارات وفى زفة رائعة جابت شوارع المدينة .

وأثناء الزفة ، شعرت إيمان ببعض التوعك ، فوضع عادل رأسها على كتفه ، وضمها بذراعه حتى شعر بارتخاء جسدها :- إيمان ، إيمان !!!.

فارقت إيمان الحياة ، فارقتها وهى بين ذراعيه ، دمعت عينا عادل ، وعادت الزفة ، وقد أطبق الصمت على الجميع ، صمت لا يكسره إلا دموع الحاضرين ونحيب عادل .

وبعد وفاة إيمان ، عاش عادل فى حالة نفسية سيئة ، تركت أثرها على مرضه ، وجعلت إستجابته للعلاج ضعيفة ، رغم محاولات والد إيمان لمواساته ، ولكنها محاولات باءت بالفشل .

ولم يمر أكثر من شهور قليلة ، حتى لحق بها إلى أكثر خلوداً وأفضل حالاً .

- عادل ، عادل .

فتحت إيمان عينيها بضعف ، ونظرت لعادل الجالس على مقعد بجوار سريرها ، وقالت :- أنا فين ؟.

- حمد الله على السلامة يا حبيبتي ، إنتى فى العناية المركزة ، عملتى العملية ونجحت الحمد لله ، ومعدش فيه أثر للسرطان فى جسمك .

- يعنى كده خلاص ، أنا خفيت .

- أيوه الحمد لله ، هتاخدى بس كام جرعة كيماوى ، علشان نضمن إننا قضينا على المرض نهائياً .

- الحمد لله .

- كلها كام يوم وتخرجى من المستشفى ونروح بيتنا .

- إن شاء الله .

ثم صمتت لحظة ، وقالت :- أنا آخر حاجة فاكرها ، إنى نمت على كتفك فى العربية ، واحنا فى الزفة ، وسمعتك وإنت بتقولى ، إيمان ، إيمان ، بس مقدرتش أرد عليك .

- أيوه ، نمتى ، ورجعنا المستشفى .

- أنا سمعتك من شوية قبل ما ترد عليا ، وإنت بتهمهم بكلام مش مفهوم ، إنت كنت بتحلم ؟.

- أيوه ، كان كابوس ، عن حاجة حصلت بعد ما نمتى على كتفى فى العربية .
- إكيهولى .

- لا ، المهم إنه كابوس ، وما إتحققش .

قاتل محترف

يجلس المعلم ربيع في محله ، وهو يضع يده على خده مهموماً ، فيأتي صبيه تامر ، ويقول :- مالك يامعلم ، فيه حاجة مزعلاك ؟.

- الحال واقف ياض ياتامر .

- بكرة تُرْزَق يامعلمى .

- هو إنت خسران حاجة ياروح أمك ، ما إنت بتاخذ يوميتك ، إشتغلنا ولا ما إشتغلناش .

ثم أكمل قوله :- وأنا بأتكلم معاك ليه ، أنا قايم مروح .

عاد ربيع لمنزله ، وغير ملابسه ، وجلس أمام التلفزيون ، فجلست زوجته بجانبه ، وقالت :- مالك ياربيع ، شايلى طاجن ستك ليه ؟.

- السوق نايم يا أم العيال ، ومفيش لا بيع ولا شرا .

- يا أخويا ، بكرة تُفَرَج .

ثم قامت لتعد طعام الغداء ، وربع يشاهد التلفزيون ، حتى عرض التلفزيون فيلماً اجنبياً عن قاتل محترف .

أتى الليل على ربيع ، ورقد في سريره يحاول النوم ، لكن النوم فارقه ، وأحداث

الفيلم تدور في رأسه ، حتى جاء الصباح ، واستيقظت زوجته ، وقالت :- إنت مالك ياراجل طول الليل عمّال تتقلب في السرير ولانمت .

- أنا بأفكر أغير شغلانتي .

- وهتشتغل إيه يافالح ؟.

- قتّال قتلى .

- بتقول إيه يا فالح ؟! ، والنبي إنت إتهلّت .

- ياوليه إفهمي ، دى شغلانة هتتغننا ، بس هاحتاج طبنجة .

- ودى هتجيبها منين ؟ ، هو إنت حيلتك مليم .

- ما أنا هاخذ حتتين الذهب بتوعك ابيعهم وأشتري الطبنجة .

- إنسى ، أنا مش هأبيع من ذهبي جرام واحد علشان هبلك ده ، ياراجل دول يدوب غويشة ودبلة عايناهم للزمن ، عايزنى أفرط فيهم .

- ما أنا هأعوضك ، وهاجييلك قدهم عشر مرات ، دا العملية الواحدة هأطلع منها بألفات .

- صحيح ياربيع ، ولّا بتضحك عليا .

- بكرة هتشوفى .

وبعد أن أقنع زوجته ، ذهب لدكانه ، وأخبر تامر بتغيير النشاط ، فقال تامر

- يامعلم دى شغلانة خطر .

- آه بس مكسبها كبير .

- والزباين هيعرفونا منين ، وإحنا جُداد في الكار .

- فيه قهوة إسمها قهوة السفاحين ، كل السفاحين بيقدوا عليها ، إحنا هنروح نقعد هناك ، والزباين تجيلنا لحد عندنا .

إشترى ربيع الطبنجة ، وذهب هو وتامر لقهوة السفاحين ، وجلسا .

وأنت الزبائن لكل السفاحين إلاً ربيع ، ولم يعد موجود بالقهوة غيرهما ، وأنتهى يومهما بلا عمل .

وتكررت الأيام ، والحال هو الحال ، يذهب ربيع وصبيه تامر للقهوة والزبائن تختار غيرهما من السفاحين .

وفى أحد الأيام ، وهما جالسين على القهوة ، قال تامر :- وبعدين يامعلم ، إحنا بقالنا فترة على الحال ده ، لا شغلة ولا شغلانة ، والمعلمين التانيين شغالين على ودنه .

- ما هو نحس أمك ده اللى واقف حالنا .

- وأنا مالى يامعلم .

- يعنى ابقى سفاح والصبى بتاعى إسمه تامر ، أنا ضرورى أغير إسمى ، من

النهاردة أنا المعلم ربيع الدباح ، وشكلك ده هاغيره .

- تغير شكلى ؟!!، إزاي ؟.

- قوم بينا نروح وهاقولك .

ولما وصلا لبیت ربيع ، قال ربيع :- شوف ياتامر أنا هأضربك مطوة في وشك ، أعملك بشلة ، تخلى اللى يشوف وشك يخاف .

تامر باكياً :- يامعلم إنت المعلم ، المفروض يخافوا منك إنت ، مش منى .

- ياض إنت إسمك تامر ، البشلة تخلى الناس يخافوا منك وأنا إسمى يخوفهم ، المعلم ربيع الدباح .

- بلاش يامعلم ، الله يخليك .

- جرى إيه ياض إنت هتعصى أوامرى .

وقام وضرب تامر بالمطواة على وجهه .

وأثمرت فكرة ربيع ، وجذب إسمه ووجه تامر الإنتباه ، حتى أتى إليهم أحد الزبائن ، يريد قتل أحدهم ، وجلس معهما يحتسون الشاي ، وأخبر ربيع بالشخص الذى يريد قتله ، ثم قال :- طلباتك يامعلم .

- خمسة وعشرين ألف جنيه .

- كام ، ما تأخذنيش يامعلم كتير ، وإنت مش معروف يعنى .

هب ربيع غاضباً ، وضرب المنضدة بيده ، فطارت الأكواب ووقع الشاي الساخن على وجه تامر وإستلقى على الأرض :- آآه ، وشى ، وشى .

نظر ربيع لتامر نظرة بلهاء ، وإندهش الزبون ، وقال ربيع :- قلت إيه يابيه ؟، وأنا مش هاخذ الفلوس إلا بعد التنفيذ .

- إتفقنا يامعلم ، دا عنوان الراجل .

إنصرف الزبون ، وهو يلتفت وراءه وينظر لتامر الملقى على الأرض يصرخ متألماً .

قام تامر وغسل وجهه ، وعاد ليجلس بجوار ربيع ، فقال ربيع :- مال وشك ياض ياتامر ، أحمر كده ليه ؟!!.

- أحمر !!!، مفيش يامعلم ، وشى أحمر من الكسوف ، علشان دلقت الشاي بتاعك إنت والزبون .

- مش مهم ، قوم يلا تجهز للعملية .

وفى منتصف الليل إرتدا الأقنعة ، وأخذ ربيع مسدسه وذهبا للعنوان ، وقفزا من فوق سور الفيلا ، ودخلا ليجدا الضحية أمامهما ، وصُعق الرجل من رؤيتهما وتصلب مكانه ، فصوب ربيع مسدسه نحو رأس الرجل ، ولكن المسدس بدلاً من أن يطلق رصاصة أطلق ماءً .

ووقف ثلاثتهم مندهشين .

فقال تامر :- إيه ده يامعلم المسدس بيطلع فيه بدل الرصاص .

- غريبة يا ض ، دا أنا معمره قبل ما نيحي .

- طيب ماحطيتش مع المية صابون ، علشان نغسل وش الزبون كويس .

- إنت بتتريق ياروح أمك .

واثناء شجارهم ، إستجمع الرجل قواه ، واخرج مسدسه من الدرج وأطلق طلقة في الهواء فانفض الإثنان وهربا سريعاً .

وفى طريق العودة أخذ ربيع يقلب في المسدس ، وصرخ قائلاً :- دا المسدس بتاع الواد إبنى الصغير ، أخذته بالغلط ، ياليلة سودة ، بينا ياتامر على البيت ، الواد ممكن يلعب بيه ويصورلنا قتيل .

ذهب ربيع ومعه تامر على عجل للبيت ، ليسمعا صوت الرصاص وصراخ زوجة ربيع ، وما أن فتح ربيع الباب حتى جاءت رصاصة ومرت بجواره ، فهرب تامر ، أما ربيع فإستلقى منبطحاً على الأرض ، وظل يزحف حتى إختبأ وراء الكنبه بجوار زوجته التي تصرخ مع كل طلقة رصاص ، ونظر من جانب الكنبه ، وقال :- هات المسدس ياحمادة .

وحمادة يطلق الرصاص سعيداً ، حتى فرغ المسدس من الطلقات ، فقام ربيع وأخذ منه المسدس ، وألقى بجسده على الكنبه .

فقال زوجته :- شفت ياموكوس آخرة دماغك ، الواد كسر الشقة ، يالهووى

، التليفزيون باظ ، إلهى يجيلك ويحط عليك ياربيع وأشوف فيك يوم ، وياترى
عملت إيه في عملية الليلة ؟، قتلت الراجل .
- لا ، حمّيته بالميه .

ظل ربيع لساعات يراضى زوجته حتى هدأت ، وناما في اليوم التالى ذهب
ربيع لقهوة السفاحين ليجد تامر منتظراً له .
- إنت بتسيبنى وتهرب ياض .

- يامعلم الواد إبنك كان عامل فيها رشدى أباطة ، وبيضرب نار في كل حطة ،
دا الرصاصة عدت بينى وبينك .

- حسابنا بعدين ياتامر ، قولى فيه زباين جت .

- أنا إستلقت زبون ، وراح مشوار وراجع .

- كنت قعدته ياض ، كده مش هيرجع .

- ما تقلقش يامعلم زمانه جاى .

جلسا لساعات ، حتى أتى الزبون ، وتوجه نحوهم ، فقال تامر :- المعلم ربيع
الدباح ياباشا ، أكبر سفاح فيكى يابلد .

تم الاتفاق ، وإنصرف الزبون ، وعاد ربيع وتامر ليستعدا ، للعملية الجديدة ،
وفى منتصف الليل ذهبا لمنزل الضحية ، وما أن وقفا أمام باب الشقة يحاولان

فتحه ، حتى سمعا صوتاً مفاجئاً ، نباح كلب .

فصرخ ربيع :- كلب ، أجرى ياض .

وهربا ، وفى طريق عودتهما ، قال تامر :- إنت بتخاف من الكلاب يامعلم ؟.

- أنا عمرى ماخفت من حاجة ، إلا الكلاب .

تمتم تامر :- وعايز تبقى سفاح !!!.

- بتقول إيه ياض ؟.

- ولا حاجة يامعلم .

ثم صرخ تامر :- إوعى الكلب يامعلم .

- كلب ، أجرى ياض .

وأخذ ربيع ذيله فى أسنانه وهروا لا ينظر خلفه ، وتامر خلفه يضحك ، فلم يكن هناك أي كلب .

وفى اليوم التالى ذهبوا كالمعتاد لقهوة السفاحين ، وما أن رأهم بقية السفاحين ، حتى إنطلقت تعليقاتهم الضاحكة ، فقال أحدهم :- عملت إيه مع الكلب يامعلم دباج ؟.

وقال آخر :- دبجه وطبخه مع ملوخية .

فقال ربيع لتامر :- إنت حكيت لحد عن اللى حصل إمبارح ياض !!!.

- والنعمة يامعلمى مافتحت بقى .

فذهب إليهم أحد السفاحين ، وهو يكاد يموت ضحكاً ، وبيده تليفونه المحمول :- شوف يامعلم ربيع الفيديو ده .

وأعطى ربيع التليفون ، لي شاهد فيديو إنتشر على مواقع التواصل الإجتماعى ، لربيع وتامر وهما يهربان فزعاً من الكلب ، وقد ظهر الكلب في الفيديو . فقال السفاح :- إنت خفت من الكلب ده ، دا كلب لولو ، الأرنب أكبر منه ، هاهاها .

ظل ربيع وتامر مصدر سخرية جميع رواد قهوة السفاحين لأيام ، حتى أتاهم زبون جديد وعملية جديدة .

وذهبا في الميعاد لتنفيذ العملية ، وعندما دخلا بيت الضحية ، فوجئاً بأن الزبون الذى إتفق معهما هو من ينتظرهما ، وهو الضحية ، فقال ربيع :- مش إنت ياباشا اللى إتفقت معانا على القهوة .

- آه ، أنا اللى عايزكم تقتلونى ، زهقت من الدنيا وعايز أنتحر بس مقدرتش ، أنا جبان .

وبكى الرجل ، وربيع وتامر وقفا مبهوتين أمام الرجل ، الذى صرخ :- يلا نفذوا وخلصونى .

وماهى إلا لحظات ، وأمسك الرجل بمسدس بجواره ، وأطلق رصاصة على

رأسه ، فصرخ تامر :- ياليلة مالهاش آخر الراجل موت نفسه .
وربيع يقف مذهولاً لا ينطق ، وارتعد ثم قال بصوت متقطع :- دم ، دم .
ثم وقع مغشياً عليه ، وتامر يحاول إفاقته :- معلمى ، يامعلمى ، فوق يامعلمى
، قوم يامعلمى الله يخرب بيتك هنروح في داهية ، وعاليز تشتغل سفاح .
وحمل تامر ربيع بصعوبة وعاد به للمنزل ، ففتحت زوجة ربيع الباب لتجد
تامر يحمله على كتفه .
- إيه اللى جراه ياواد ياتامر ؟!!
- الراجل اللى رحنا نقتله موت نفسه قدامنا ، فالمعلم أول ما شاف الدم سورء
، هاتى فحل بصل نفوقه .
أحضرت زوجة ربيع بصلة ، ووضعتها على أنف ربيع ، ففتح عينيه وقال :-
أنا فين ؟!
- إنت في بيتك ياراجلى وخيبة أملى ، بتخاف من الدم يا ابن الهبله وعاليز تبقى
سفاح ، قوم يا موكوس .
قام ربيع خجلاً ، وانصرف تامر لمنزله ، وإنقضت الليلة ، وفى اليوم التالى
بعد أن إستيقظ من نومه ، وأثناء تناوله طعام الفطور مع زوجته وأولاده ، قال
لزوجته :- أنا بأفكر أغير نشاطى تانى .
نظرت إليه زوجته ، وقامت من موضعها دون أن ترد عليه ، وذهبت للمطبخ

، وأحضرت سكين كبير ، وقالت :- إنت كنت بتقول إيه يارببيع ؟.
ربيع بخوف :- أنا مقلتش حاجة ولا فتحت بقى .
- طيب ، إطفح وإنت ساكت وروح على دكانك .
- حاضر .
وأكمل فطوره ، وهو ينظر إليها بخوف ، والسكين بيدها .

قلبٌ أتلّفه الهوى

قلبٌ ، أتلّفه الهوى

حلّق عالياً ، ثم هوى
كم كان معذباً بالجووى
وفى طريق العشق ، قد سعى
ظمانُ للحبِ ، وما ارتوى
إلا نهر العين ، وما بكى
وفى سمعه ، صوتها والصدى
يتردد عليه ، ليلاً وضُحى
لا يفارقه ، إن نام أو صحى
فأوى إلى ركنٍ ، وزوى
لعله يتوب ، وقد نوى
عن ذاك السبيل ، ومن غوى
رحم الله ، من بالسهم قد رمى

وعن الوصال ، ابتعد وأبى
لكنه قدرُ ، به الإلهُ قضى
قلبُ أتلّفه الهوى

أشعر بك

- أنا أشعر بكِ دون أن أراكى أو أسمعك .

- وكيف هذا ؟!!!.

- إنى أشعر بكِ عندما تكتبين إسمى ، أنتى تكتبيه بأربع طرق مختلفة .

عندما تكونى غاضبة منى ، تكتبيه وكأنك تشيحى بيدك .

وعندما تُغضبينى ، تكتبيه وكأنك تعتذرى ، ولا تريدین الإعتذار .

وعندما تتألمى ، تكتبيه وكأنك ترتمين بين أحضانى .

وعندما أغازلك ، تكتبيه وأنتى خجولة .

وفى كل الأحوال ، أحب إسمى عندما تكتبيه .

عايز أسافر

قال لها : عايز أسافر .

- تسافر ليه ؟ .

- عايز أمشى من البلد دى ، لكن عندى نقطتين ضعف ، أمى وإنتى .

- واضح ، علشان كده عايز تمشى وتسيينا .

صمتت لحظات ، ثم استطردت : عموماً إنت حر ، إمشى ، سافر ، دى حياتك وإنتم حر فيها .

ابتسم .

كيف يبتعد عن إمرأتين ، أحدهما أمه والأخرى وطنه .

لا يستطيع أن يبتعد عنهما .

فقال لها : خلاص مش هأسافر .

فقالت بعصبية ممزوجة بالإبتسام : منك لله يابايخ ، أنا جالى صداع .

ما تستغربش

بنتقابل فى الحياة ، صدفه

نكسب حد معانا ، لو وقا

ونخسر غيره ، ونستكفى

ما تستغربش

الدنيا فزوره ، ما نفهمها

مرة أشواك ، ما نهضمها

ومرة فاكهة ، نستطعمها

ما تستغربش

قلوب عليك ، بتتقلب

وعقول عليك ، بتتشقلب

وهموم عليك ، بتتغلب

ما تستغربش

نصيبك فى الحياة ، شوفه

وحقك منها ، ما تفوته
وحزنك لو حاصرك فوته
وما تستغربش

طبيب بلا حدود

نادر طبيب شاب ، يبلغ من العمر تسعة وثلاثون عاماً ، يعيش حياة إجتماعية معقدة ، فقد تزوج مرتين من قبل ، وقد إنتهت الزيجتين بالطلاق ، لعدم قدرته على الإنجاب .

رضى نادر بقضاء ربه ، وانغمس فى عمله كطبيب بأحد المستشفيات الحكومية .

وفى إحدى المناسبات ، إلتقى بفتاة شابة إسمها سالى ، أعجب بها من أول نظرة ، ولكن عقله أبى عليه ذلك ، أما القلب فلا حكم له عليه .

تبادلا أطراف الحديث وأرقام الهواتف ، ومع مرور الوقت وبعد إتصالات ولقاءات متكررة ، تغلغل حبها فى قلبه ، فأصبح لا يفكر فى أى أمر من أمور حياته سواها ، فصارحها بحبه وأجابته بالمثل .

وفى إنتظار أن يتخذ خطوة جادة لتتويج هذا الحب بالزواج ، لم يقم نادر بأى حركة إيجابية ، فهو يعلم جيداً أن ظروفه الإجتماعية وتعذر الإنجاب سوف يمثلان عائقاً كبيراً أمام زواجه من حب عمره ، لم يحب أحداً قبلها ولن يستطيع أن يحب بعدها ، لكن من يتقبل مثل هذه الظروف .

بدأت سالى تشعر بالقلق ، ماهى نتيجة هذه العلاقة ، وهو بالنسبة لها شخص

غامض ، لا تعرف عنه إلا القشور ، حتى بدأت بالضغط ليه فى إحدى اللقاءات ، وسألته .

- نادر ، أنا عايزة أعرف إيه آخرة علاقتنا ، أنا ماعرفش عنك أى حاجة .

- أنا بحبك ، عمرى ما حببت حد قبلك ولا هاحب حد بعدك ، لكن أنا ظروفى الإجتماعية معقدة جداً .

- إيه هى ظروفك دى ؟ ، أنا عايزة أعرفها ، ليه مش عايز تصارحنى ؟!

- علشان مش عايز أحكى .

- مش عايز تحكىلى ، المفروض إن أنا حبيبتك ، ومن حقى أعرف كل حاجة عن الإنسان اللى هارتبط بيه .

وتركته وذهبت .

وظل نادر يتهرب منها كلما حاولت ، ولكنها واصلت الضغط عليه ، حتى إلتقيا ذات يوم ، وقال :- عايزة تعرفى إيه هى حياتى المعقدة ، أنا إتجوزت مرتين قبل كده ، والمرتين إنتهوا بالطلاق بسبب عدم الإنجاب .

ثم خر باكياً ، وقال :- إنتى حب عمرى ، لكنك بالنسبة ليا أمنية مستحيلة ، أنا مش عايزك تربطى حياتك بيا ، كل اللى أتمناه إنك كل يوم تبعطلى رسالة تقولىلى صباح الخير ، شوفى حياتك ومستقبلك .

- أنا مش كفاية عليا أقولك صباح الخير وخلص ، أنا بحبك .

واستمرت العلاقة ، ولكن مع مرور الوقت بدأ الملل يتسرب إلى قلب سالى ،
وشعر نادر بذلك ، حتى كلمات الحب لم تعد تقولها أو تردّها عليه ، فتكلم مع
إحدى الصديقات وصارحها بواقع الحال ، وطلب منها أن تتحدث مع سالى ،
ليعلم سبب تغييرها نحوه .

تحدثت الصديقة مع سالى ، وصارحتها أنها تحبه ، ولكن ظروفه هذه ، هل
من الممكن أن يتقبلها أهلها أم لا .

وفى ظل هذه العلاقة المبهمة ، والتي بدأت فى الفتور من ناحيتها ، ولكنها
إزدادت شغفاً وعشقا من ناحيته .

وفى أحد الإتصالات ، قال نادر :- أنا قدمت فى منظمة أطباء بلا حدود ، وقبّلت
وهاسافر قريب .

- عارفاها ، بس دى شغلها خطر ، كلها فى أماكن حروب وأوبئة ، إيه اللي
يخليك تعمل كده ؟.

- أنا ماليش حياة هنا .

- وأنا ومامتك ؟.

- إنتوا نقطة ضعفى .

- واضح جداً ، علشان كده عايز تمشى وتسيينا ، عموماً براحتك يادكتور ،
دى حياتك وإنّت حر فيها ، إتفضل سافر .

وبكت وأغلقت الخط .

وبدا نادر فى إنهاء إجراءات السفر ، ودموع والدته لاتنقطع ، وهى تعلم أن
إبنها مسافر للخطر المجهول ، ولا تدرى هل سيعود أم لا .

سافر نادر ، وتنقل بين البلدان لمدة عامين ، دون أن يعطى نفسه ولو يوم واحد
راحة ، وعندما يتصل بأمه يخبرها بمدى سعادته بالعمل الذى يؤديه .

حتى تحددت وجهته القادمة .

أفغانستان .

وبعد مرور شهر من عمله فى أفغانستان ، تداولت وسائل الإعلام أخبار عن
إختطاف عدد من أطباء منظمة أطباء بلا حدود ، وأحدهم مصرى .

واعتصر الخوف قلب أم نادر ، هل إبنها أحدهم .

وعلى جانب آخر ، علمت سالى بالأخبار المتواترة ، وبدا عليها القلق .

حتى تم نشر صور الأطباء المختطفين ، ونادر أحدهم بالفعل .

وعلى مدى أيام تضاربت الأقوال حول مصير هؤلاء الأطباء ، حتى أذاعت
إحدى القنوات فيديو للأطباء .

جلست سالى أمام التلفزيون ، تشاهد الفيديو المذاع ، وقد إقتربت الكاميرا من
وجه أحدهم .

إنه نادر ، يتمم بكلمات ، قرأتها سالى من شفاهه ، وهو يقول :- بحبك ، أشهد
أن لا إله إلا الله وأن محمد رسول الله .

ثم إخرقت رصاصة قلبه ، ذلك القلب الذى قُتل قبل أن تصيبه الرصاصة ،
قلب عاش غريباً ومات غريباً .

وبعد مرور عدة أشهر ، أعادت منظمة أطباء بلا حدود حقيبة نادر ، وبها
جميع متعلقاته الشخصية .

فتحت الأم الحقيبة وهى تبكى وليدها ، ووجدت قصاصة من الورق بخط يده
مكتوب بها :-

نحيا ونموت فى هذا العالم ، ولا نريد سوى أن يتذكرنا أحدهم ، ولكننا بشر
، مصابون بآفة النسيان .

إِنْ كُنْتُ ذَنْبًا

إِنْ كُنْتُ ذَنْبًا ، فَبَابِ التَّوْبَةِ مَفْتُوحٌ
لَا أُخَيِّبُ الظَّنَّ ، وَأَبْدَأُ بِالسَّرِّ لَا أَبْرُوحُ
فَأَنَا كَالْمِرَاةِ ، تَرَى نَفْسَكَ فِيهَا ، لَكِنَّا بِلَا رُوحِ
زَجَاجِهَا مِنْ أَلْمَاسٍ ، بِرَيْقِهَا نُورٌ وَضُوحُ
أَسْمَعُ أَنْيْنَ شَكْوَاكَ ، وَلَكَ صَدِيقٌ نَصُوحُ
قَلْبِي كَصَرْحٍ كَبِيرٍ ، رَبَّمَا أَكْبَرُ الصَّرُوحِ
فِيهِ شِفَاءٌ لَأَلَامِكَ ، إِنْ أَصَابَتْكَ الْجُرُوحُ
لَا أُغْضِبُكَ ، وَإِنْ أَنْتَ أَغْضَبْتَنِي صَفُوحُ
فَكُنْ لِي غِيَاً ، تَسِيلُ قَطْرَاتِهِ عَلَى السَّفُوحِ
تَتَبَّتْ زَهْرَةً مِنْ يَاسْمِينٍ ، بِالْعَطْرِ تَفُوحُ
فِي وَادٍ مِنَ الزَّمَرْدِ ، بِهِ عَصْفُورٌ يَنْوَحُ
مِنْ لَهَيْبِ شَوْقِهِ لِعَيْنَيْكَ ، وَوَجْهَكَ الصَّبُوحُ
سَأَكُونُ لَكَ قَارِبَ نَجَاةٍ ، لَا يَعْرِفُ الْجَنُوحُ

ينتـشـلك من أحـزانـك ، وإن كانت كالقـروح
لا تخشـانى ، واختبئ فى أحضانى لا تروح
ما يخفيه القلب فى طياته ، به العيون تبوح
عيون مبرأة من الآثام ، كمهرة مدللة جموح
تفشى الأسرار جميعها ، ولها الإذن ممنوح
لا حكم لى عليها ، أحفظ السر وهى فضوح
فلا يخيب ظنك بى ، واغفر لعينى ما تبوح

إهدى يا حاجة

إهدى يا حاجة ، ما تهدي يا عم
إسكتى يا مادام ، وياريت نتلم
طويل وتخين ، رُفيع وقزم
عاملين دوشة ، صداع وغم
خناق وزعيق ، وسب وشتم
تحبوا الفوضى ، لا نظام ولا سلم
مفيش تقدير ، ولا حتى فيه دعم
الجهل بقى مرض ، ومات العلم
البلطجة رجولة ، والشاطر اللى يُخم
والطيب منبوذ ، وطبعه يتذم
لا أدب ولا أخلاق ، جاتكو الهم
مش عارفين تربوا ، لا أب ولا أم
العيل صايح ، والبنت شيء يُغم

جرالكوا إيه ، لسانكم بينقط سم
العدل بينكم راح ، وساد الظلم
جشعكم زاد ، ناس نُص كُـم
أكلتم حرام ، حتى مال اليتيم
إتعدلوا بقى ، وخلّو عندكو دم
ما تهدى يا حاجة ، وإتلم يا عم

تعرف

تعرف ، أحلى ما فيك ، هى عيونك
الناس لو شافوا جمالها ، يحسدونك
خبى الابتسامة ، وغطيها بجفونك
وابعد عن الحزن ، ولا تنزل دموعك
تعرف ، أحلى ما فيك ، هى عيونك
الدنيا حلوة ، واحلوت أكثر بوجودك
إن كنت عاقل ، ولّا حتى بجنونك
القلب يحضنك ، وجوّاه يصونك
تعرف ، أحلى ما فيك ، هى عيونك
لو بايدي أسعدك ، وأمحي شجونك
وأخلى القمر ينزل ، ينور دروبك
مع إن نور القمر ، هيختفى بنورك
تعرف ، أحلى ما فيك ، هى عيونك

الشمس كسفت ، قدام رقتك وكسوفك
وشجر التفاح غار ، من لون خدودك
ليك حق تتقل عليا ، ويزيد غرورك
تعرف ، أحلى ما فيك ، هي عيونك

بامبينو

خواجة خريستو	خلف بامبينو
إسم الله عليه	سماه باولينو
عيونه زرقا	وشعره أصفرينو
عمله سبوع	والكل مباركينو
راح بيه للدكتور	وقامو مطاهرينو
ومن الأمراض	بالحقنة مطعمينو
باولينو فجعان	عايز يرضعينو
جابه له لبن	وباكتة بامبرزينو
خريستو محتاس	مفيش قروشينو
مرتبه مش مكفى	والباقي مستلفينو
البامبينو كبر	ودخل البيبي جاردينو
لبس ومصروف	وبوكس لانشينو
خريستو تعب	محتاج فلوسينو

إجمد ياخريستو	دا لسه في الجاردينو
لسه فيه مدرسة	وهتدفع مصروفاتينو
وكتب خارجية	ودروس خصوصينو
ولو تعب ، تروح	للدكتور عليه تكشفينو
وتجيب له علاج	حقن وشراب ولبوسينو
دا غير الفواتير	مية وغاز وكهربينو
وهتعمل إيه بقى	لما يروح الجامعينو
ويتخرج ، ويبقى عاطل	ويقولك جوزينو
وتصرف عليه	وعلى عروستينو
خريستو خد قرار	يشتغل حرامينو
راح يسرق بنك	قام الناس ماسكينو
قبضوا عليه	وحطوه في الحبسينو
وخدوه للقاضى	قاله ليه تسرقينو
خريستو قال	علشان أجيب مم لبولينو
القاضي قاله براءة	روح للبامبينو

خريستو مجرمينو	قالوا ليه تسييه
تجلده وتسجنينو	كان لازم تعاقبه
دا مسكين محتاجينو	قال القاضى
ربنا معاه ويعينو	هيعمل ايه
ومش مصدقينو	خريستو روّح
من السجنينو	إن ربنا نجاه
أكون حرامينو	وقال توبة لله
لقى مراته وباولينو	دخل بيته
أنا حاملينو	قالتله ياخريستو
ووقع مسورئينو	عيط خريستو

حكاية

حكاية تيجى ، ووراها حكايات
يدوب نبداً ، نلاقى النهايات
نروح نيجى ، نتوه فى متاهات
قلوب عايشة ، تتألم بنبضات
بصوت عالى ، ولّا بهمسات
وقلوب ماتت ، صوتها سكات
جرحها الزمن ، وساب علامات
لسان ينطق ، من غير كلمات
ووشوش تتبدل ، قدام مرايات
صاحبها واحد ، ولكن بقناعات
ناس تضحك ، ضحكها دمعات
والحزن جواها ، زى الروايات
شرابها أسى ، وطعامها فُتات

من يوم ولادتها ، ولحد الممات
وناس تايهة ، ضايعة في شتات
تلف في دواير ، تدور عن الذات
مفيش بكرة ، وضاع اللي فات
هى الدنيا كده ، مليانة حكايات
مرت دقائق ، أو حتى ساعات
أولها بُكا ، وآخرها تكون رفات
فعيش أيامها ، من غير حسابات
يرتاح بالك ، وتنتهى الأهات

دنيا تمثيلية

دنيا تمثيلية ، وكله على كله بيمثل
إتفرج عليهم بيمثلوا ، وإنت إستهبل
خليك إنت المخرج ، وإياك تكون ممثل
تكالك على الله ، وعلى البشر ما تتوكل
تبقى إنت حويط ، واوعى تكون الاهل
دا الدنيا عايضة الجدع ، مش المغفل
حُر زى الطير ، والحبس ما يتقبل
يعافر معاها بقوة ، وقصاها يستقتل
صوته في الحق عالى ، صdah بيجلجل
خطوته تهز الجبل ، والأرض تتزلزل

عقد ملكية

شوف يابنى ، إياك تبص لحد ، غير ليا
شابة كانت ، أو طفلة ، في المهد صبية
أموتك ، وآخذ عمرك وروحك ، بإيديا
تموتينى ؟ ، للدرجة دى ، بتغيرى عليا
بأغير ، إنت ملكى ، خلاص بقيت ليا
طيب قوليلى ، إنتى معاكى عقد ملكية
أيوه معايا ، كتبت بنوده بدموع عينيا
إنت طرف أول ، بائع ، وأنا المشترية
تعبت قلبى معاك ، وغيّرت كثير فى
وأنا اللي طول عمرى ، عنيدة وقوية
معاك ضعيفة جداً ، تغلبنى كلمة بحنية
حبيتك فى رقتك ، وحببت قسوتك عليا
حاولت ابعد عنك ، لكن حبك بقى غية

وصعب ييجى بعد الحب دا ، كراهية
هتضى ، برضاك ، على عقد الملكية
أفرح قلبك وعيونك ، وتحلو الحياة بيا
ولّا تموت ، ويقولوا شهيد الرومانسية

الحاج قطب

إحدى قرى الريف عام ١٩٧٩

بعد صلاة العشاء في مسجد القرية ، يأتي الكهربائي لتركيب بعض الأجهزة الكهربائية بالمسجد ، فيتعجب الحاج قطب ويقول لإمام المسجد الشيخ خالد : هو إيه ده ياشيخ خالد ؟ ، وإيه اللي جاب الواد عبدربه الكهربائي ؟!.

- وزارة الأوقاف بعثت لنا ميكروفون ومراوح للجامع يا حاج قطب .

- إيه الميكروفون ده ؟.

- دا مكبر صوت للأذان ، علشان صوت المؤذن يسمعه أهل البلد كلهم .

- مكبر صوت ؟! ، والله ما أنا فاهم حاجة ، سلامو عليكم أنا مروح .

ابتسم الشيخ خالد ورد : وعليكم السلام يا حاج .

قام عبدربه بتركيب الميكروفون والمراوح ، وعند آذان الفجر ، أذن المؤذن في الميكروفون ، ودوى صوته في أرجاء القرية ، فاستيقظ الحاج على صوت الأذان فزعاً من قوة الصوت ، وأيقظ زوجته ، وقال : لا إله إلا الله ، إصحى ياولية .

- فيه إيه يا قطب ؟!.

- مش سامعة صوت آذان الفجر عامل إزاي ، الصوت جاى من السما ، القيامة قامت .

وارتدى جلبابه سريعاً ، وهو يردد الشهادة ، فقالت له زوجته : رايح فين ؟.

- رايح الجامع ، عايز أقابل ربنا وأنا هناك .

وهرول للمسجد ودخله ، ليجد الشيخ خالد وبعض أهل القرية جلوس ، والمؤذن واقفاً ، ممسكاً بالميكروفون ، ويردد الآذان ، فقال : القيامة قامت ياشيخ خالد ، صوت الآذان جاى من السما ، الله أكبر ولا إله إلا الله .

فقال الشيخ خالد : قيامة إيه يا حاج قطب ، دا الميكروفون .

- يعنى صوت الآذان مش جاى من السما .

- لا دا صوت المؤذن أهه قدامك ، بيأذن في الميكروفون .

فذهب الحاج قطب للمؤذن ، وأمسك بتلابيبه ، وقال : هي الحديد دى اللى هترفع الآذان ، أنا عايزك تطلع على المدنة وتأذن عليها من فوق وصوتك يجلجل في البلد كلها .

فقام الشيخ خالد وخلص المؤذن من يد الحاج قطب ، وقال : يا حاج قطب الدنيا بتتطور ، والميكروفون علشان يعلى صوت الآذان ويسمعه القريب والبعيد .

- أنا ما أفهمش الكلام ده ، لازم يطلع يأذن فوق المدنة .

- إهدى ياحاج قطب وتعالى نصلّى الفجر .

وصلوا صلاة الفجر ، وإنصرف كلاً لحاله بعد الصلاة .

وكان الشيخ خالد بعد كل صلاة عصر ، يلقي درساً في شئون الدين لرواد المسجد ، يتبعه فترة للأسئلة لمن يريد فتوى أو تفقه في الدين ، وأثناء الدرس كان الحاج قطب مشتتاً لا ينصت جيداً للدرس ، على غير عادته ، بل كان يحدق في مراوح المسجد التي تدور .

وبعد أن إنتهى الدرس ، قال الشيخ خالد : كده درس النهاردة خلص ، حد عنده سؤال ؟.

فقال الحاج قطب ، بصوت عالى : أنا .

- إتفضل ياحاج قطب .

- أنا عايز أعرف المراوح دى ليه بتلف شمال ومش بتلف يمين ؟.

فضحك الشيخ خالد ، والمصلين ، وقال : اللى صنعها خلاها تلف كده ، ياحاج قطب .

- نرجعهاله ، إحنا من أهل اليمين ، إزاي وزارة الأوقاف تجيب مراوح من واحد بيخليها تلف شمال .

فضحك الجميع ، وغضب الحاج قطب : بتضحكوا على إيه ، أنا ماشى . وظل

الحاج قطب يذهب للمسجد لأداء جميع الصلوات ، ولكنه يشعر بالغضب من التطور الذى حدث بالمسجد .

وفى صباح أحد الأيام ، عاد أحد الفلاحين من أرضه وهو يصرخ : غيتونا ياهوه ، عرفة الإبيارى إتقتل .

وأسرع أهل القرية جميعهم ، لمكان الحادثة ليجدوا عرفة مضرجاً في دمائه ، وملقى على ظهره ، ومضروباً على رأسه ، وبجواره فأس ملطخ بالدماء .
وأنت الشرطة لتحقق في الجريمة ، وتبين أن سبب الوفاة ضربة على الرأس بالفأس .

وعندما أخذت الشرطة أقوال أهل القرية ، فقالوا أنهم لا يعرفون ما حدث فقد وجدوه مقتولاً هكذا ، لكن تعرف الكل على الفأس أنه يخص الحاج قطب .

ألقت الشرطة القبض على الحاج قطب ، وأودعته الحبس حتى العرض على النيابة ، مع أن أقوال أهل القرية أكدت أن الحاج قطب رجلاً طيباً ، ومن غير المعقول أن يقترب جريمة كتلك ، رغم أن الفأس ملكه .

وعرض الحاج قطب على النيابة ، فقال وكيل النيابة : إسمك إيه يا حاج ؟.

- قطب المنشاوى يابيه .

- عندك كام سنة ؟.

- خمسة وعشرين سنة .
- تعجب وكيل النيابة ، وقال : خمسة وعشرين سنة إزاي يا حاج ؟!
- معرفش يابيه ، أهو عمرى كده .
- طيب بلاش السؤال ده ، إبنك الكبير عمره كام سنة ؟.
- أربعين .
- يا حاج حرام عليك ، يعنى إنت أصغر من إبنك ؟.
- يابيه أنا هأفكر إيه ولا إيه ، أنا راجل كبير في السن .
- فضرب وكيل النيابة كفاً بكف ، وقال لكاتبه المنهمك في الكتابة : بتكتب إيه ؟
- ، دا مش عارف سنه ولا سن إبنه ، إكتب عمره حوالى سبعين سنة .
- ثم سأل الحاج قطب : الفاس اللى لاقوه جنب جثة عرفة بتاعك ؟.
- آه بتاعى .
- طيب ، قتلتاه ليه ؟.
- والنعمة يابيه ، ما قتلتاه ، وإسأل مراتى و عيالى ، أنا كنت معاهم في الدار .
- عندك شهود تانيين غير مراتك و عيالك .
- لا ، الشاهد ربنا .

- ونعم بالله ، شكلك هتغلبننا يا حاج .

ثم استدعى العسكرى ، وقال : خد الحاج رجعه الحبس .

وأثناء خروج العسكرى بالحاج قطب ليودعه الحبس ، أتى تقرير البحث الجنائى ، وبه وجود بصمات لشخص مجهول على الفأس مع بصمات الحاج قطب ، فكلف وكيل النيابة ضابط المباحث بالبحث عن صاحب البصمات .

وبعد البحث والتحقيق ، تبين أن البصمات الموجودة على الفأس لرجل مسجل خطر ، إسمه صبحى جزر ، كان على خلاف مع عرفة ، فكمّن له في الحقل بعد أن سرق فأس الحاج قطب ، وعندما رأى عرفة ، قام بضربه على رأسه بالفأس فقتله ، وفر هارباً .

ألقت المباحث القبض على صبحى ، وأفرجت النيابة عن الحاج قطب ، وعاد لمنزله ، فاغتسل وذهب لصلاة العصر في المسجد .

وعندما دخل المسجد تلقاه الشيخ خالد ، وأهل القرية الموجودون في المسجد مباركين ومهنيين بالبراءة ، وقال الشيخ خالد : شفت بقى يا حاج قطب التطور خلى المباحث تعرف إن مش إنت القاتل ، وطلعت براءة الحمد لله .

- تطور إيه ؟ ، أنا خرجت بفضل ربنا .

- ونعم بالله ، دا بعد فضل ربنا طبعاً ، يلا نصلى العصر .

وبعد الصلاة ، قال الحاج قطب : أنا عايز أعرف برضه ليه المراوح دى بتلف

شمال ، وما بتلفش يمين .

فضحك الشيخ خالد ، وقال : أنا هأكلم المسؤولين في وزارة الأوقاف يغيروا
المراوح دى ، ويجيبولنا مراوح بتلف يمين .
- أيوه كده ، ربنا يجعلنا من أهل اليمين .

آه لو الزمن

آه لو الزمن ، يرجع شوية
ويغير حاجات ، كثير فيا
هأقوله وقّف ، وماتجريش بيا
بتجري ليه ، ولّا دا عندك غيّة
دا العمر ضاع ، ومالوش ديّة
اهدى يازمن ، وماتجيش عليا

التركة

عصر يوم السبت ، إتصل ياسر هاتفياً بصديقه عصام : ألو ، إزيك ياعصام .

- الله يسلمك ياياسر ، مالك يابنى ، صوتك متغير .

- أيوه ، متضايق شوية ، ما تيجى تسهر معايا الليلة وأفضض معاك .

- حاضر أجيلك ، تسعة كويس .

- تمام .

وأقفل ياسر الخط ، وفى تمام التاسعة حضر عصام ، ودخل الشقة ، وأحضر

ياسر القهوة ، وجلسا في الشرفة ، وقال عصام : قولى بقى حصل إيه ؟.

- أهلى ياعصام .

- مالهم ؟.

- إنت عارف إنى مش مقصر معاهم ، وكل طلباتهم مجابة ، وعارف إنى

مكنش ليا حظ في الجواز ومعنديش أولاد ، بس حسيت إنهم طمعانيين فيا ،

النهاردة قبل ما أكلملك عمتى جاتلى عايزة فلوس لإبنها يشتري عربية ، رغم

إنى عارف إنها مش محتاجة ، فقلت لها إصبرى عليا أسبوع وهأحضرلك

المبلغ اللى إنتى عايزاه ، علشان مفيش معايا سيولة دلوقتى ، أسبوع واحد

ويكون المبلغ جاهز ، تفتكر ردت عليا قالت إيه .

- إيه ؟.

- قالت إنها قدامه عربية لقطة ولازم تجيب الفلوس دلوقتى ، إتصرف ، فقلت لها ، خليه يكلم صاحب العربية ويديله عربون وبعد الأسبوع يكون المبلغ في إيده ، ردها التانى بقى وجعنى .

- ليه ، قالت لك إيه ؟.

- قالت هتعمل إيه بالفلوس اللى بتكنزها دى ، إنت لا ليك أخ ولا أخت ، ولا ليك عيال ، يعنى الفلوس دى في الآخر لينا ولعيالنا ، هاتها نتمتع بيها ، ومشيت زعلانة .

- تنفلق يا أخى ، ملعون أبوها ... ، لا مؤاخذه يا صاحبى .

ضحك ياسر وقال : إنت خلّيت فيها لا مؤاخذه ، طول عمرك لسانك طويل .

- ماهى حاجة تعصب يا بنى والله .

- أنا مش جايبك علشان كده ، أنا عايز رأيك في موضوع بقالى فترة بأفكر فيه ، وبعد موقف النهاردة قررت أنفذه .

- موضوع إيه ؟.

- أنا بأفكر ، أقسم تركتّى على عمى وعمتى ، وأريح نفسى من وجع الدماغ ده ، أنا عديت الخمسين ومفيش في عمرى قد اللى راح ، وعلى رأي عمتى

التركة فعلاً رايحة ليهم ولعيالهم ، يبقى ياخدوها من دلوقتي ، وأرتاح أنا .

- وإفرض تعبت ، أو إحتجت فلوس ، هيساعدوك .

- بصراحة مش عارف .

- شوف ياياسر ، ربنا شرّع الميراث بعد موت الإنسان مش قبل موته ، لما تموت بعد عمر طويل يبقىوا يتقاسموا ، لكن بالوضع الحالي ده وكلام عمتك ، دول طمعانيين فيك ، ومنتظرين إنك تموت ، لو قسمت تركتك عليهم محدش هيسأل فيك ، ولا هيساعدك .

- ياعصام ، أنا عايز أرتاح من الصداع ده .

- قولى ، أهلك يعرفوا ثروتك قد إيه .

- لا ، حتى شركتى محدش منهم يعرف عنها حاجة ، ولا حتى بيدخلوها ، والعقارات وأرصدة البنوك محدش يعرفها .

- كويس .

- إنت بتفكر في إيه ؟ .

- بكرة هأقولك .

وفى يوم الخميس التالى ، إتصل ياسر بعصام ، وقال بصوتٍ مُتَعَبٍ : إحقنى ياعصام ، عندى وجع فى صدرى وحاسس إنى بأموت .

اتصل عصام بصديقه دكتور ياسين وذهبا على الفور لشقة ياسر ، وأعلنت وفاته ، فاتصل عصام بأهل ياسر ، وأخبرهم بالوفاة .

وتمت مراسيم الجنازة والعزاء ، وبعد إنصراف المعزين ، قام أهل ياسر بتقاسم ونقل محتويات الشقة ، حتى أصبحت خاويةً على عروشها .

وفى اليوم التالى للوفاة ، أحضر عصام محاميه لأهل ياسر لعمل الإجراءات القانونية ، لإعلام الوراثة وتقسيم التركة ، وفوجئ الجميع بعد أن قرأوا أوراق ياسر ، بأن كل تركته هي فقط الشقة والسيارة ومليون جنيه فقط ، رصيد في البنك ، وأنه قام ببيع شركته وعقاراته من فترة ، وقام بسحب تسعة مليون جنيه من البنك يوم الأحد السابق للوفاة ، ولا يعلم أحد مصيرها ، ولا مصير ثمن الشركة والعقارات ، مما أثار غضب الأهل .

وبعد إعلان الوفاة بيومين ، ذهب شاب لعم ياسر وأخبره مفاجأة ، وهى أنه ابن ياسر من زواج عرقى .

فقال العم : معاك مستندات يابنى تثبت اللى بتقوله .

- أيوه ، معايا ورقة الجواز العرقى .

- يابنى حط نفسك مكانى ، مفيش معاك مستندات وعايزنى أصدقك .

فقالت العمه : إنت نصاب وجاى تنصب علينا ، مش كفاية ابن أخويا ابن الكلب ، مات ، وما سابش غير شقة وعربية وشوية ملاليم .

فقال الشاب بثقة : أنا مستعد أعمل تحليل دى إن إيه ، علشان تتأكدوا ، طلع سليم أستلم ميراث أبويا ، ولو طلع مش سليم إعملوا فيا اللي إنتوا عايزينه .
فقال العم : أنا هأتصل بالمحامى بيحى يخرب بيتك ويعملك محضر نصب .
واتصل العم بالمحامى الذى حضر على الفور ، وسمع حديث الشاب كاملاً ، ثم أخذ العم جانباً ، وقال : شوف يا حاج ظهور الشاب ده ، هيعمل مشكلة كبيرة ، وممكن يرفع قضية هتعتل كل إجراءات الميراث ، أنا رأيى نعمله تحليل دى إن إيه زى ما قال ، ولو طلع نصاب أنا هأحبسه ، ونبعد عن سكة المحكمة اللي هتعتلنا .

إقتنع العم بكلام المحامى ، وذهبوا في اليوم التالى لأحد المعامل ، واخذوا عينة من شعر الشاب ، وعينة أخرى من شعر ياسر ، كان المحامى أحضرها من القبر بعد أن ذهب للمقابر ومعه الترابى ، وعينة ثالثة من عم ياسر للمطابقة وبعد يومين ظهرت نتيجة التحليل ، إيجابية ، الشاب ابن ياسر .

ذُهل أهل ياسر ، واستشاطوا غضباً ، وهموا بالإعتداء على الشاب ، فمنعهم المحامى ، وقال : دا دلوقتى معاه مستند رسمى ، لو رفع عليكم قضية هيكسبها بالتأكد ، وهيسبب ليكم مشاكل كتير ، خلوه ياخذ ميراثه من غير شوشرة أفضل .

فقالت العمة : ياخذ إيه ، إحنا قعدنا سنين مستنيين اليوم ده ، اللي هناخد فيه فلوس ياسر ، يقوم بيحى ولد زى ده ياخذ كل حاجة على الجاهز ، دا أنا أدفنه

هنا حى .

وإنهالت بالسباب على الشاب هي وأخيها وأبنائهم ، والمحامى يحاول منعهم من الإعتداء على الشاب ، الذى يجلس مبتسماً ببرود .

وأثناء هذا الشجار ، دخل رجل من باب الشقة ، وأطبق صمتٍ بذهول على الجميع .

فهب الشاب واقفاً ، وقال : إتفضل ياياسر بيه ، دا تقرير المعمل ، ودى ورقة الجواز العرفى .

فقال ياسر : شكراً يابنى تعبتك معايا ، تقدر تمشى ، وما تنساش تفوت على عصام يدريك بقية أتعابك .

وانصرف الشاب ثم إتفت ياسر للمحامى ، وقال : إزيك يامتر ، الجماعة دول تعبوك مش كده ؟.

- جداً ياياسر بيه .

ضحك ياسر ، وقال : إنت إتعاملت معاهم كام يوم بس ، أنا بقى معاهم فوق الخمسين سنة .

هذا وأهل ياسر يكادون يلقون حتفهم ذهولاً ورعباً ، مما يحدث أمامهم ، ثم نظر لشقته الخاوية بحزن ، وقال : دا مفيش حتى كرسى نقعد عليه .

ثم جلس ياسر على الأرض .

أجمع العم قواه التي خارت ، وقال : الحمد لله يا بنى إنك بخير ، دا أنا كنت هأموت من زعلى عليك .

وقالت العمة : إبنى حبيبى ونور عينيا .

إبتسم ياسر ، وقال : إبنك وحبيبك ونور عينيكى ، من شوية كنت إبن كلب ، عموماً دا مش موضوعنا ، طبعاً إنتوا نفسكم تعرفوا إيه اللى حصل اليومين دول ، هأحكيلكم .

ثم بدأ برواية ما حدث يوم السبت وبعد أن إنصرفت عمته من عنده غاضبة ، لأنه لم يعطيها المال الذى تريده ، لشراء سيارة لإبنها ، وحضور صديقه عصام عنده مساء ذلك اليوم ، حتى وصل لقول عصام .

عصام : أنا هاتصل بأصحابنا هشام ويوسف وياسين ، ونتجمع بكرة عندك هنا زى دلوقتى ، وعلى ما أظن محدش من أهلك يعرف حد من أصحابك غيرى ، مش كده برضه ؟.

- آه ، ما يعرفوش غيرك ، بس فهمنى إنت هتعمل إيه ؟.

- ما تستعجلش بكرة هتفهم ، أنا هأقوم أروح ، واكلمهم وبكرة نجيلك .

ثم إنصرف عصام ، وإتصل بأصدقائهما .

وفى مساء اليوم التالى ، حضر عصام لشقة ياسر ، وتبعه الأصدقاء الثلاثة ،

وجلس الخمسة على مائدة السفرة ، وقال عصام : أنا كلمتكم إمبراح وعرفتكم اللى بيحصل مع ياسر من أهله ، وعازين نتفق على خطة نعملها ، وقبل أي كلام أو إتفاق ، يياسر إنت واثق فينا كلنا .

- طبعاً يا عصام واثق فيكم ، إنتوا أقرب ليا من الأخوات .

- تمام .

فقال هشام : ما تفهمنا يا بنى إيه اللى في دماغك .

- هأشرح لكم ، أولا هنركب كاميرات مراقبة سرية ، في كل حطة في الشقة حتى الحمام والمطبخ ، تنقل لينا اللى بيحصل صوت وصورة ، هشام ويوسف رجال أعمال زى ياسر ، هنعمل عقود بيع وشرا بتاريخ قديم ، يبيع فيها ياسر شركته وممتلكاته من عقارات وخلافه ليكم إنتوا الإثنين ، بس علشان الأمانة وضمان الحقوق هنعمل عقود ضد لياسر بالممتلكات دى ، هتمضوا عليها إنتوا الإثنين .

ثم إلتفت لياسر ، وقال : فيه رصيد قد إيه في البنك يا ياسر ؟.

- عشرة مليون .

- تمام ، بكرة الصبح تروح البنك وتسحب تسعة مليون ، وسيب مليون واحد بس ، وهتروح الشقة القديمة بتاعتى ، فيها خزنة تحط فيهم الفلوس ، ودا مفتاح الشقة ومفتاح الخزنة ، والورقة دى فيها أرقامها السرية ، غير الأرقام وحط

الفلوس ، ومش هيبقى فيه ممتلكات بإسمك غير الشقة والعربية والمليون جنيه وبس ، أما إنت بقى يادكتور ياسين ، مطلوب منك تطلع شهادة وفاة لياسر .

تعجب ياسر ، وقال : إنت عايز تموتنى يامجنون ولا إيه ؟!!.

فقال عصام : يابنى ما تستعجلش ، يوم الخميس الجاى ، هتتصل بيا وتتكلم بصوت تعبان ، وتقول إلحقنى ياعصام أنا عندى وجع فى صدرى وحاسس إنى بأموت ، وأنا هأسجل المكالمة على المحمول ، وأقفل معاك وأتصل بالدكتور ياسين صديقى ونجيك ، يدبك حقنة منومة ، تخلى اللى يشوفك يقول دا ميت فعلاً ، مش تقدر تعمل كده يياسين ؟.

فقال ياسين : أيوه .

فقال عصام : بعدها يمشى ياسين ويروح يحضر شهادة الوفاة ، وأنا أتصل بأهلك وأقولهم خبر الوفاة ، وندفنك ونعمل عزاء .

فقال ياسر ضاحكاً : يخرب بيتك ، عايز تدفننى حى .

فضحك عصام : يا حبيبى ما تخافش ، هشام وياسين هيطلعوك من القبر ، بعد ما الكل يمشى من هناك ، وياخدوك بالعربية على شقتى ، وهناك هتبقى جنب الخزنة اللى فيها فلوسك ، وهاركبك شاشة تشوف بيها اللى بيحصل فى الشقة ، صوت وصورة ، وقتها هتعرف أهلك هيعملوا إيه لو إنت مت ، وبعد كام يوم تظهر ونقول الدكتور غلط ، وإنك كنت فى غيبوبة وفُتت فى القبر ، وناس

خرجوك منه بعد ما سمعوا صوتك ، وترجع لحياتك ، قبل ما حد منهم يطول
مليم من ثروتك .

تبسم ياسر ، وقال : دى مش فكرة مجنونة وبس ، دى بنت مجنونة كمان ، أنا
موافق .

فقال عصام : إتفقنا ، بكرة تروح البنك وتسحب الفلوس وتحطهم في الخزنة
زى ما قللتك ، وبكرة بالليل هنتجمع هنا إحنا الخمسة نكتب عقود البيع ، وورق
الضد ، ونركب الكاميرات .

وفى صباح اليوم التالى (الأحد) ، ذهب ياسر للبنك وسحب التسعة مليون
ووضعهم في الخزنة الموجودة في شقة عصام ، وعاد لشقته ، وفى المساء
تجمع الخمسة وكتبوا العقود ، وقاموا بتركيب الكاميرات وجربوها ، ثم قضوا
سهرتهم في مزاح وإنصرفوا .

وفى يوم الخميس التالى إتصل ياسر بعصام ، وأخبره بأنه يشكوا من آلام في
صدره ، وأحضر عصام الدكتور ياسين الذى أعطى ياسر حقنة منومة وأعلنوا
وفاته ، وبعدها أخبر عصام أهل ياسر بالوفاة ، فحضروا على الفور ، وأعدوا
مراسم الدفن والعزاء ، وخرجت الجنازة حتى المقابر ، أما يوسف وهشام
فكانوا يراقبون ما يحدث من بعيد دون أن يراهم أحد .

وبعد أن إنتهت الجنازة ، ودفنوا ياسر ، وإنصرف الجميع من المقابر ، ذهب
يوسف وهشام على الفور ، وأخرجوا ياسر المخدر من القبر ، وذهبوا به إلى

شقة عصام ، وحضر إليهم ياسين وأعطى ياسر حقنة أفاقته ، ففتح ياسر عينيه وقال : أنا فين ؟.

فضحك الثلاثة ، وقال ياسين : إحنا في شقة عصام ، قوم يامرحوم وإقلع الكفن وخذلك دش ، عايزين نتفرج على اللي هيحصل .

قام ياسر وإغتسل ، وإرتدى ملابس كان عصام ، قد أعدها له في الشقة ، وجلسوا أمام الشاشة يشاهدون ما يحدث في شقة ياسر ، فقال ياسر : أومال فين عصام .

فقال يوسف ضاحكاً : في العزا بتاعك .

وعلى الشاشة تظهر عمة ياسر تضاحك إبننتها ، وعندما يأتي أحد من المعزين تبكى وتولول ، وانتهى العزاء ، وانصرف المعزين ، وعاد عصام لأصدقائه سريعاً ، لي شاهد معهم ما يحدث .

وما أن إنصرف الناس من الشقة ، وبقي بها أهل ياسر ، حتى قاموا بفتح مكتبه وأدراجيه ، وإبتدأوا تقسيم موجودات الشقة من أثاث وأجهزة وملابس وأوراق وغيرها ، وهم يتشاجرون ، هذا يقول أنا سوف آخذ هذا ، والآخر يقول بل أنا ، وأخذوا كل ما في الشقة وأحضروا سيارات لنقلها حتى أصبحت الشقة خاوية على عروشها .

فبكى ياسر ، وقال : دول ما صبروش ، ومخلوش حاجة في الشقة .

ربت أصدقائه على كتفه ، وقال عصام : مش قلتلك يا صاحبي ، ما تقلقش أنا قتلهم إني هأجيبهم المحامي بتاعى يخلص لهم إجراءات الإعلام الشرعى ، وإتفقت معاه يعطل الإجراءات على قد ما يقدر ، علشان ما يلحقوش ياخدوا الشقة أو العربية أو المليون جنيه .

ثم ضحك عصام ، واستطرد : أما عفش الشقة بقى ربنا يعوض عليك فيه . فضحك الأصدقاء الخمسة .

فقال ياسر : أنا عايز ألاعبهم شوية .

فقال عصام : عايز تعمل إيه ؟ .

- نطلع لهم وريث ياخذ منهم التركة ، تقدر تشوف شاب يروحهم ويقولهم إنه ابنى ، ويكون معاه ورقة جواز عرفت هاكتبها بخط إيدى .
- أقدر طبعاً .

- تمام ، وانت من ناحيتك ، لما يظهر الوريث الجديد ، تخلى المحامى يوقف الإجراءات بحجة إن فيه ابن ظهر ، وللازم يتأكد من النسب قبل تقسيم التركة ، ونجهز عينة من شعرى نديها للشاب ده على إنها من شعره ، ويوسف وهشام يروحوا المقابر ويسيبوا عينة تانية من شعرى هناك ، بعد كده المحامى يروح المقابر ، وياخذ معاه حد من أصحابنا على إنه تربى وياخدوا عينة الشعر من القبر ، وعلشان نأكد الموضوع أكثر ، المحامى يقول عايزين ناخذ عينة كمان

من عمى وطبعاً العينات هتكون متطابقة ، وخلينا نتفرج شوية كمان .

إنتهى ياسر من رواية لعبته هو وأصدقائه ، ثم قال لعمه وعمته وهما ينتحبان : هو ذا الملعب اللي عملته فيكم ، دلوقتي تخرجوا من هنا ، ومش عايز أشوف وش حد فيكم تاني ، لحد ما أموت .

ثم إنفت للمحامى ، وقال : يامتر ، يرجعوا كل حاجة أخذوها من الشقة ، وتسجيلات الكاميرات موجودة عندك ، لو مفيش حاجة رجعت تبلغ الشرطة بالسرقة .

فهز المحامى رأسه موافقاً ، ونظر الأهل لياسر بإستعطاف ، وقال عمه : هنرجع كل حاجة يابنى .

فقال ياسر ودموعه تنسال : إستعجلتوا موتى ، أنا كده كده هأموت في يوم من الأيام ، وبرضه هتورثونى ، أنتوا أهلى والتركة حقكم بعد موتى .

ثم إستطرد : بعد موتى ياعمى .

سيفر الرجوع

القاهرة - القنصلية الإيطالية

ديسمبر ١٩٣٨

يستلم سكرتير القنصلية تليغراف من وزارة الخارجية الإيطالية ، ويدخل إلى مكتب القنصل .

- فيه إيه يابرونو ؟.

- تليغراف سيادة القنصل من وزارة الخارجية .

يفتح القنصل التليغراف ويقرأ ما فيه مصدوماً .

فيقول برونو :- إيه اللي مكتوب في التليغراف سيادتك ؟.

- مصيبة يابرونو ، الخارجية بتبلغنى إن المارشال بادوجليو جاى بعد أسبوع يفتش على الجنود بتوعنا هنا فى مصر .

- دى فعلاً مصيبة ، إحنا بنبعث للحكومة أوراق وهمية ، ومفيش جنود على أرض الواقع .

- أيوه ، وكده هيعرفوا إننا كنا بنعمل ده علشان نصرف مرتبات وناخدها لنفسنا ، دول هيعدمونا .

- عندى إقتراح لحل المشكلة دى .

- قول يابرونو .

- أنا أعرف يهودى مصرى إسمه جيداليا روزين ، عنده قهوة فى حارة اليهود ، والعاطلين اليهود بيقتعدوا عليها دايماً ، نكلمه يورد لنا العدد اللى نحتاجه ، نعملهم جوازات سفر إيطالية ، ونلبسهم الزى الرسمى ، ونصرف لكل واحد منهم وجبه وخمسين قرش مصرى ، وندرّبهم على الوقوف والسير بالطريقة العسكرية .

- فكرة ممتازة ، إتحرك فوراً ونفذ .

وفى الحال بدأ برونو بالتحرك ، والتقى بيجداليا ، وتم تجهيز المجموعة فوراً ، وكان أحد هؤلاء الشباب اليهود ، شاب يهودى مصرى إسمه إيلى شمعون ، عمره عشرون عاماً ، وأعطوه جواز سفر إيطالى .

وجاء يوم التفتيش المنتظر ، وانتظم الجنود فى صفوف مرتبة ، وملابس مهندمة ، وحضر المارشال بادوجليو لمقر السفارة ، وأبدى إعجابه بالجنود ، والقنصل وبرونو فى أسعد حال ، ومر اليوم على خير .

وفى اليوم التالى أرسل المارشال بادوجليو للقنصل أمراً للجنود بالإستعداد للسفر مع الجيش الإيطالى لأثيوبيا .

وما أن علم شباب اليهود بالأمر حتى ثارت ثائرتهم ، وكادوا يقتلون جيداليا ،

واستقر بهم الحال على الهرب والإختفاء ، حتى يتوقف الجيش والقنصلية الإيطالية عن طلبهم .

وهرب إيلي عند بعض معارفه فى المنصورة .

أوروبا

سبتمبر ١٩٣٩

اندلعت الحرب العالمية الثانية ، وأصبحت القارة الأوروبية جمره من النار ، واليهود على مستوى العالم في رعب قاتل ، خاصة في أوروبا والشرق الأوسط ، وإيلي يزداد هلعاً ، فهو بين أن يكون يهودياً يخشى أن ينتصر الألمان ، وبين أن يكون إيطالياً في مصر التي ترضخ تحت الاحتلال البريطاني عدو إيطاليا .

مرت ست سنوات وانتهت الحرب ، وعاد إيلي لإستخدام هويته اليهودية المصرية ، ومن المضحك أن يصبح هو وزملاءه أبطالاً أمام الطائفة اليهودية ، لأنهم رفضوا الحرب مع وطنهم إيطاليا وحليفتها ألمانيا ، لولاءهم العظيم لقوميتهم اليهودية .

القاهرة - حارة اليهود

مايو ١٩٤٨

كان إيلي يجلس على مقهى جيداليا ، وإذا به يرى صديقه مورييس ليفى قادماً

نحوه وهو يهرول فزعاً ، فوقف إيلي ، وقال :- مالك ياموريس ؟!.

- الحرب قامت يا إيلي .

- حرب إيه ؟.

- حرب بين العرب واليهود في فلسطين ، العرب والمصريين هيموتونا ، أنا معدش ليا عيشة هنا أنا هاهاجر على إيطاليا .

- تهرب وهنا بيتك .

- وأنا هاعمل إيه بالبيت وأنا ميت ، وإنك كمان إهرب .

- هاهرب إزاي ؟.

- إنت نسيت اللي حصل في القنصلية الإيطالية ، أنا وإنك معانا جوازات سفر إيطالية ، نروح القنصلية ، ويرحلونا ، ونمشي من هنا .

- أنا مش لاقى آكل ، ومش معايا مصاريف السفر ، تسلفني وأسافر معاك ياموريس .

- منين يا حبيبي ، هو أنا حيلتي مليم ، دا أنا هأستلف تمن التذكرة من واحد قريبي وهاخذ مني الدين بالفايز .

- وتركه موريس وانصرف ، ولم تمر عدة أيام إلا وموريس قد غادر مصر إلى إيطاليا ، لكن إيلي لم يستطع أن يسافر وهو لا يمتلك ثمن تذكرة السفر .

ظل إيلي في مصر واستخدم هويته الإيطالية من جديد ، فهو إيلي شمعون داخل حارة اليهود ، أما خارجها فهو مواطن إيطالي ، وبدأ البحث عن عمل يستطيع من خلاله تأمين تذكرة السفر لإيطاليا .

ووجد بالفعل وظيفة براتب متميز في أحد الشركات بمساعدة جواز سفره الإيطالي ، ولم يخبر أحداً بشأن وظيفته الجديدة ، فكان يخرج كل يوم بملابسه الرثة ومعه حقيبة في يده ، ثم يذهب إلى أحد الحمامات العمومية ، ويستبدل ملابسه بالزى الرسمي لعمله في الشركة ، ولم يعلم أحد من جيرانه أين يذهب ولا ماذا يعمل ، ولم يعد أحد يتذكر ما حدث في القنصلية الإيطالية من عشر سنوات ، خاصة أن كل زملاءه من شباب اليهود والذين كانوا معه في القنصلية هجروا الحارة وانقطعت أخبارهم ، حتى مورييس صديقه المقرب قد هاجر لإيطاليا ، وجيداليا صاحب المقهى الذى اخذهم للسفارة قد مات ، فأصبحت هويته الإيطالية سرّاً لا يعلمه غيره ، وتحسنت حالته الاقتصادية بفضل الوظيفة ، وشارك تاجر اسمه الحاج محمد في تجارة الأقمشة بحى الموسكى بجانب وظيفته ، وبالطبع دون أن يعلم شريكه بشأن الجنسية الإيطالية .

وأصبح روتينه اليومي ، في الصباح يخرج من منزله كشاب يهودى ، ويستبدل ملابسه ويذهب لوظيفته كمواطن إيطالي ، ثم يغادر الشركة ويستبدل ملابسه مرة أخرى ، ويعود للحارة ، وفى السادسة من مساء كل يوم يذهب لشريكه في دكانهما لتجارة الأقمشة بالموسكى ، ويظل بالدكان حتى موعد إغلاقه في الحادية عشر من مساء كل يوم ، ثم يعود لمنزله بالحارة .

القاهرة

يوليو ١٩٥٢

قامت ثورة يوليو ، وتنازل الملك فاروق عن عرشه ، وبعدها بعام أُعلنت الجمهورية المصرية وانتهت الملكية ، واهتزت الأرض تحت أقدام اليهود فى مصر ، وبدأوا فى بيع جميع ممتلكاتهم ، وتهريب أموالهم خارج البلاد تمهيداً لخروجهم منها ، ما جعل البوليس المصرى يراقب اليهود فى كافة أنحاء البلاد مراقبة صارمة ، منعاً لتهريب مزيداً من الأموال خارج مصر ، خاصة أن الدولة الصهيونية باتت تشجع اليهود للهجرة إليها وبالذات الأغنياء منهم .

تأزم موقف إيلى وأصبح يخشى أن تُكتشف هويته الإيطالية ، فتوقف عن الذهاب لوظيفته التي يعمل بها ، وهو مطمئن نسبياً أن الشركة لا تعلم شيئاً عن كونه يهودياً ، ففى الشركة يعرفون فقط أنه إيطالى مسيحى .

وذات يوم ذهب لدكانه فى الموسكى ، وجلس بجوار شريكه الحاج محمد ، الذى بادره بالسؤال :- مالك يا إيلى ؟.

- أنا خايف ، البوليس كل يوم يمسك حد من اليهود .

- وإنت مالك ومالهم ؟.

- ما أنا يهودى .

- يابنى دول ناس أشقيا علشان كده البوليس بيمسكهم ، وطول ما إنت فى حالك

وبعيد عن العيال دول محدش هيمسك .

ثم إستكمل حديثه :- أنا مش عارف ليه ولا مؤاخذه اليهود بيعملوا كده ، تهريب فلوس وتفجيرات ولبش ، ما إنتوا طول عمركم أباً عن جد عايشين وسطينا ، إيه اللي جرى ، تعرف أنا كان ليا إثنين أصحاب واحد قبلى كان إسمه توفيق ، وواحد يهودى ، تعرف اليهودى يبقى مين ؟ .

- مين ؟ .

- شمعون أبوك .

إندهش إيلى ، فبادره الحاج محمد قائلاً :- ما تستغربش ، أبوك كان صاحبى من واحنا عيال ، ياما لعبنا مع بعض ، ولما كبرنا إتشاركنا مع بعض فى تجارة ، وبعدين فضينا الشركة علشان كان عايز يشارك ابن عمه .

- كنتوا شركا كمان .

- أيوه ، أو مال أنا شاركتك ليه ، إكراماً لصداقتى معاه ، إسمع نصيحتى يابنى ، إنت إتولدت هنا ودى بلدك ، دينك ده بينك وبين ربنا ، لكن مصر بلدنا كلنا ، إياك يابنى تمشى ورا العيال دول .

هز إيلى رأسه موافقاً ، ثم قال :- انا هاقوم أروح .

- إتفضل يا إيلى ، تصبح على خير .

غادر إيلى الدكان متوجهاً لمنزله فى حارة اليهود ، وقد قاربت الساعة على

منتصف الليل ، فتح باب الشقة ، وألقى بجسده على الأريكة منهكاً .
ثم هب فزعاً ، عندما رأى خيالاً لشخصٍ ما يخرج من حجرة النوم ، متجهاً نحوه .

- إنت مين ؟ .

- هههههه ، مش فاكرنى يا إيلى ، أنا موريس ليفى .

هرول إيلى نحو موريس ، بعد أن تبدل فزعه فرحاً ، واحتضن موريس بقوة :- موريس صاحبى وأخويا ، رجعت إمتى ؟ .

- من فترة ، ممكن تقول كده من شهر تقريباً .

- حمد الله على السلامة يا حبيبى ، بس قولى ، إنت إيه رجعت مصر ، ودخلتها إزاي أصلاً ، ودخلت شقتى إزاي وإمتى ، وليه مغير شكلك ولبسك كمان ، إنت لابس لبس عامل ؟ .

- واحدة واحدة يا إيلى ، هافهمك كل حاجة ، بس الأول فيه حد بيجيلك هنا ؟ .

- لا ، ما إنت عارف إنى عايش لوحدى .

- تمام ، إسمع بقى اللى هأقولك عليه ، وركز معايا كويس .

جلس موريس على المقعد ، وقال :- أنا دخلت مصر بجواز سفرى الإيطالى ، وغيرت شكلى ولبسى ، علشان محدش يعرفنى ، أنا بعد ما سافرت إيطاليا

انضميت للمنظمة الصهيونية ، وسافرت إسرائيل ، وبقيت ظابط في الموساد الإسرائيلي ، وتم تدريبي على أعلى مستوى ، وبكده دخلت شقتك ، التدريب على أعلى مستوى .

ثم استكمل حديثه :- أما سبب رجوعى ، فأنا بأقوم بعمليات تهريب اليهود وأموالهم بره مصر ، مع عمليات ثانية مش هأقدر أقولك عنها ، وجيتلك علشان اخرجك بفلوسك من هنا .

- تخرجنى ؟!!! ، إزاي ؟!!!.

- إزاي دى بتاعتى ، المهم جهاز فلوسك علشان تسافر إيطاليا ، وطننا القومى وحكومته مهتمين بيك جداً ، وفيه واجب عليك نحو وطنك .

- وطن إيه وحكومته اللى مهتمين بيا ، ويعرفونى منين أساساً ؟!!!.

- إسرائيل يا إيلى ، وطن اليهود ، أرض الميعاد اللى رجعنا ليها بعد الشتات .

صمت إيلى ثم قال :- أنا مش فاهم ، إيه المطلوب منى ؟!.

- تجهز فلوسك وتستعد للسفر .

- أنا فلوسى كلها فى التجارة بتاعتى مع الحاج محمد .

- عندك أى فلوس غير فلوس التجارة دى .

- لا .

- حلو أوى ، أنا عايزك تمارس حياتك عادى زى كل يوم ، وكل ليلة ترجع شقتك الساعة ١١ بالليل ، ما تتأخرش عن كده ، وما تقابلش حد ولا حد يجيلك بعد الوقت ده ، وأنا هأجهز فلوسك وترتيبات السفر .

- إزاي هتجهز فلوسى ؟!!!!.

- ما تسألش يا إيلى ، إنت عليك تنفذ اللى أقولك عليه وبس .

ثم هب واقفاً ، وقال :- أنا هأمشى ، وعلى فكرة سيب كل حاجة فى الشقة زى ماهى ، مش هتحتاجها .

- وهدومى ؟.

- هدوم إيه يا إيلى ؟! ، الشقة واللى فيها مش ضرورى ، شالوم .

- شالوم .

غادر موريس وترك إيلى مندهشاً ، ولكنه إطمئن أن صديقه قد أتى لإخراجه من جحيم مصر المنصب على اليهود .

مرت ثلاث ليال ، ولا خبر عن موريس ، وفى الليلة الرابعة فى تمام الساعة الواحدة صباحاً ، استيقظ إيلى على خبط على باب الشقة ، فقام وفتح الباب ليجد موريس أمامه وعلى كتفه حملاً ثقيلاً .

- إيه ده ياموريس ؟!!!!!!.

- قتللك ما تسألش .

وفى الثالثة صباحاً ، استيقظ سكان الحارة على إنفجار مدوى ودخان كثيف وألسنة من اللهب تخرج من شقة إيلى شمعون ، وبعد جهود مضنية من رجال الإطفاء ، وبمساعدة بعض الأهالى تمكنوا من إطفاء الحريق ، وتولت النيابة والبوليس التحقيق فى أسباب الحريق ، وكان التقرير النهائى ، حريق ناجم عن إنفجار قنبلة ، تسببت فى إحتراق الشقة وتفحم محتوياتها بالكامل ، مع وجود جثة متفحمة فى غرفة النوم ، إستنتجت النيابة أنها لمالك الشقة إيلى شمعون .

نابولى - قصر المليونير فيرو جوليان

أكتوبر ١٩٨٢

يجلس فيرو على كرسى المكتب وظهره نحو المكتب ، ينظر من النافذة على حديقة القصر المزينة بأنواع الزهور .

يدخل الخادم حجرة المكتب ، ويقول :- سنيور موريس فى القصر يطلب مقابلتك .

- خليه يتفضل .

يخرج الخادم ويدخل موريس :- بونجورنو سنيور فيرو .

يلتف فيرو بالكرسى ، ويشير لموريس بالجلوس :- بونجورنو سنيور موريس ، سعيد بوجودك .

- إزيك يا إيلي ؟.

- مش قلنا بلاش إيلي هنا ، أنا سنيور فيرو .

يضحك موريس :- طبعاً سنيور فيرو .

يقوم فيرو ويحضر كأسين من الشراب ، ويعطى موريس أحدهم ، ويجلس بجوار موريس على الأريكة ، ويقول :- إيه المطلوب ياموريس ؟.

- عملية جديدة .

- هي العمليات بتاعتكم دى مش هتخلص ؟.

- فيرو حبيبي ، إحنا بنخدم وطننا الأم ، إسرائيل ، وماتنساش إن كل اللى إنت فيه ده ملك للوطن ، مجرد تغطية .

- مش ناسى ، قول العملية فين ؟.

- مصر .

- مصر ؟!!!!!!.

- أيوه .

- إنت نسيت إيه اللى عملناه قبل ما نخرج منها ؟.

- لا طبعاً ما نسيتش ، دا مصدر فخرى .

- طيب وهنرجع نعمل إيه هناك ، مادمت لسه فاكّر .

- فيرو عزيزى ، الوضع إتغير ، إحنا دلوقتى في سنة ١٩٨٢ ، وحروبنا مع المصريين إنتهت خلاص ، وبقي بينا وبينهم معاهدة سلام ، إحنا خرجنا من مصر من ثلاثين سنة ومحدث هيفتكر اللى حصل وقتها .

- إيه المطلوب ؟.

- إنت عارف إن المصريين إضطهدونا كثير ، وخرجونا من مصر وعبدالناصر وعساكره إستولوا على أموالنا وممتلكاتنا في مصر ، وبما إن بقى فيه علاقة سلام ، يبقى يرجعولنا حقوقنا .

- حقوق إيه ؟ ، ما إنت عارف زى ما أنا برضه عارف إن اليهود خرجوا بفلوسهم من مصر ، وأى ممتلكات لينا سيبناها خراب .

- آه يا حبيبى عارف ، لكن العالم ما يعرفش ، أو بمعنى أدق إحنا أقنعنا العالم إنه ما يعرفش ، أنا وإنت وغيرنا من اليهود المصريين الأصل هنرفع قضايا وننزل مصر نطالب بممتلكاتنا ونطلب تعويضات كمان ، إنت مثلاً ليك بيت في حارة اليهود ودكان في الموسكى اللى إتشاركت فيه مع الحاج محمد ، وإنت المسكين خرجت من مصر هربان وحقك أخده المصريين .

- الحاج محمد ؟!!!!.

- أيوه الحاج محمد .

- مورييس ، إنت عارف بتقول إيه ؟ ، كده ولاده ممكن يقتلونى .

- إيلى ، محدش يقدر يلمسك حتى .

- ما قلنا بلاش تقول إيلى .

- مش هتفرق إنت برضه ، إيلى شمعون ، هترجع لإسمك الحقيقى .

صمت إيلى ، وتذكر ما حدث ليلة خروجه من مصر ، ففي تلك الليلة ذهب مورييس للحاج محمد في الدكان ، بعد أن راقبه بدقة وعلم أنه في ذلك الوقت من الليل يكون وحده ، وأخبره أن إيلى مريض بالبيت ويريد منه أن يذهب له ، فأخبره الحاج محمد أنه سوف يغلق الدكان ويذهب إليه على الفور ، ثم إنصرف مورييس واختبأ في بير سلم منزل إيلى منتظراً قدوم الحاج محمد ، وعندما دخل من بوابة المنزل باغته مورييس من خلفه وأمسك برقبته وكسر عنقه .

ثم حمله وصعد الدرج لشقة إيلى ، الذى فوجئ بمورييس يحمل الحاج محمد على كتفه ، ووضع مورييس جثة الحاج محمد على سرير إيلى ، ورجع للدكان وسرق كل ما فيه من مال .

ثم عاد مجدداً لإيلى ، ووضع قنبلة زمنية بعد أن ضبط الوقت أن تنفجر في الثالثة صباحاً ، ثم غادر هو وإيلى واستقلا تاكسى ينتظرهم في أحد الشوارع الجانبية يقوده أحد زملاء مورييس من التنظيم الصهيوني ، وسافرا سوياً إلى

الأسكندرية حيث ركبا الباخرة المتجهة إلى إيطاليا .

وفى الثالثة صباحاً انفجرت القنبلة في شقة إيلي ، واختفى الحاج محمد ولا يعلم أحد أن جثته هي التي كانت في منزل إيلي .

قطع موريس صمت إيلي ، وقال :- إيلي ؟!، سرحت في إيه ؟.

- إفتكرت ليلتى الأخيرة في مصر .

- ماتخافش إحنا عاملين خطة محكمة مفيهاش ثغرة ومرتبين كل حاجة ، جهز نفسك للسفر للقاهرة الأسبوع الجاي ، ودى تذكرة الطائرة وجواز سفر إسرائيلى باسم إيلي شمعون ، وأنا هأقابلك هناك في سفارة إسرائيل ، شالوم يا حبيبي .

- شالوم .

القاهرة

أكتوبر ١٩٨٢

وصل إيلي مطار القاهرة ، وخرج من صالة الوصول ليجد سيارة بلوحات دبلوماسية ، إستقلها وتوجه مباشرة لسفارة إسرائيل ، ليقابل موريس الذى كان يجلس مع السفير الإسرائيلى .

وبعد أن تبادلوا التحية ، قال موريس :- إحنا رتبنا كل الأمور وحضرنا الأوراق ووكلنا محامى يرفع القضية ، وهنخرج من هنا ، نقابله على طول ،

بعد كده هتروح حارة اليهود ، وهيكون معاك مصور علشان يصورك قدام بيتك وعند معبد موسى بن ميمون ، يومك مشحون معلىش بس علشان بكرة ترجع إيطاليا ، ودى تذكرة السفر .

- وإيه لازمته التصوير ؟.

- حبيبى علشان ننشر الصور في الصحف العالمية ، ونكسب تعاطف شعوب العالم ، وكمان نشجع كل اليهود يرفعوا قضايا وياخدوا تعويضات من الحكومة المصرية ، إحنا هنبداً بقضايا في المحاكم المصرية ، ولو الحكم مش لصالحنا هنصعد الموضوع للمحكمة الدولية ، ومش هنسكت إلا لما ناخذ التعويضات اللى تعجبنا .

- وياترى الفلوس دى مين هياخذها ؟.

يضحك موريس :- حبيبى ، فيفتى فيفتى ، النص للوطن الأم ، والنص لليهود المظلومين المساكين .

هز إيلى رأسه ، وكأنه كان يعلم الرد مسبقاً ، ثم قال :- وأنا هاروح حارة اليهود لوحدى .

- طبعاً يا حبيبى ، السفارة ضرورى ما تظهرش في الموضوع ، وإلا القضية تاخذ طابع سياسى ، إحنا عايزين الموضوع يظهر للرأى العام العالمى على إنه حنين اليهود المشتتين لماضيهم ، ورغبتهم في إسترداد حقوقهم أو التعويض

عنها ، وما تخافش إحنا هنبقى مأمنينك ، لكن من بعيد لبعيد ، ولو حصل أي شيء هنتدخل فوراً .

- تمام .

وخرج إيلي من السفارة حسب البرنامج الموضوع ، فذهب للمحامى وأكمل إجراءات وأوراق القضية ، ثم توجه صحبة مصور لحارة اليهود .

وفى حارة اليهود ، إنقط المصور عدة صور لإيلي وهو يظهر مشاعر الحنين لماضيه ، ووقف أمام منزله القديم ، الذى تبدو عليه آثار الحريق ، حتى لفت إنتباه سكان الحارة ، فذهبوا إليه :- إنت مين ؟.

فرد إيلي بلهجة مصرية مكسرة :- أنا إيلي شمعون ، مصري ، وده بيتي .

لفت الإسم أحد رجال الحارة من كبار السن ، وقال :- إنت إيلي شمعون ؟ .
- أيوه .

- شريك الحاج محمد تاجر الموسيقى .

ارتبك إيلي ، وأجاب :- أيوه .

- دى حاجة عجيبة ، إيلي مات فى الانفجار اللى حصل فى شقته ، وأنا بنفسى شفت جثته متفحمة والإسعاف بيثيلها ، وتانى يوم لقينا الحاج محمد اختفى ، ومن ساعتها محدش يعرف له خبر .

إزداد إرتباك إيلي وتوتره ، وأخرج جواز سفره ، ليثبت له أنه إيلي .
وما أن علموا من الجواز أنه إسرائيلي الجنسية ، حتى إنفجر الأهالي غضباً ،
وأمسكوا بخناق إيلي والمصور وحطموا الكاميرا ، وأدخلوها أحد الدكاكين
عنوة .

وبعثوا من يحضر منصور حفيد الحاج محمد .

حضر منصور ، وقال :- خير يار جالة فيه إيه ؟!.

فرد العجوز :- ده يبقى إيلي شمعون ، اليهودى ، شريك جدك محمد يامنصور
، طلع حى ومش هو اللى جثته كانت في البيت يوم الانفجار اللى بعده جدك
إختفى ، ومن وقتها محدش يعرف له طريق جرة .

- قصدك إيه يا حاج ؟!.

- والله يابنى أنا الفار بيلعب في عبي ومحتار ، إذا كان ده إيلي شمعون تبقى
جثة مين اللى كانت في شفته ، وجدك راح فين ، فص ملح وداب ، وفلوس
المحل إتسرقت ليلتها .

- عندك حق يا حاج .

ثم نظر لإيلي ، وقال :- إنت مش هتخرج من هنا إلا لما نعرف إيه اللى حصل
، هتتكلم ولا إيه ؟.

- أتكلم أقول إيه ؟ ، أنا معرفش حاجة .

فانهال الأهالى ضرباً بإيلي حتى إعرّف بكل ما حدث في تلك الليلة .
ثم أصدر الرجال الحكم النهائي الذى لا رجعة فيه ، العين بالعين والسن بالسن ،
و قتلوا إيلي وألقوا جثته في الشارع وإنصرف كلاً منهم لحال سبيله .
علمت السفارة الإسرائيلية بما حدث لإيلي وأبلغت السلطات المصرية ، والتي
علمت بالملعوب الذى كانت تخطط له الدولة الصهيونية .
فأحضروا مندوباً من السفارة ليتسلم جثة إيلي من على الأرض ، وحققت
النيابة وتم قيد القضية ضد مجهول ، فلا أحد يعلم من قتله .
أما موريس ، فما أن وصله خبر إيلي وما حدث له ، حتى ذاب جلده عن جسده
رعباً ، وغادر مصر على الفور بلا رجعة ولا رجوع .

همه‌مات

- ألا تستحى ، تُقبلنى .

- وما الضير ؟.

- ألم تعلم بأن القبله لا تجوز ، إلا إذا أتبعته بضمة .

ننسى ، أو هكذا نعتقد ، ولكننا فى الحقيقة ندعى النسيان .

أصدق الرسائل ، هى تلك التى نكتبها ولا نرسلها .

وما الحياة إلا رسائل نكتبها ، على أمل أن يقرأها من كُتبت له .

قد يكون الفراق صعباً .

ولكنه أهون من أن تحب شخصاً لا يصدق مشاعرك تجاهه .

نمرض ونخف .

نتغنى ونفلس .

نفرح ونحزن .

كله بيعدى ، إلا كسرة القلب ، بتاخذنا مننا ، وما بنقدرش نرجع تانى .

الصمت لغة .

لا يتكلمها إلا من يجيدها .

ولا يعرفها إلا من يفهمها .

الصمت لغة .

ذات معنى ، عندما يكون الكلام بلا معنى .

الصمت هو لغة القلب ، عندما يتوقف اللسان عن الكلام .

اصمت .

ربما يكون مجرد ألبوم صور ، لكنه حياتى بأكملها ، وطنى .

أصعب موقف ممكن تعيشه فى حياتك ، إنك تقابل شخص وتحس إن هو ده
توأم روحك ، اللى بتدور عليه طول عمرك .

وإنه الشخص اللى بيكملك ، وإنه الشخص اللى بيبكون حافز ليك ، واللى عايز
تكمل عمرك معاه ، وتموت وإنت معاه .

وفجأة ، تلاقيه بيبعد عنك أو بيبعدك .

ما بتبقاش عارف إنت اللى أوهمت نفسك بإنه توأمك ، ولّا هو اللى أوهمك
وفى الحالتين بتكتشف ، إنك إنت المخطئ .

نبتسم ، ونجتهد أن نُغيّر ملامحنا .

حتى لا يرى أحد ، ما نعانيه فى داخلنا .

أحياناً ننجح .

وأحياناً ، يطغى الحزن ، ويرتسم على تجاعيد وجوهنا .

عندما تكون الأيام باردة ، فالיום المشمس يكون مميزاً ، الشمس تمثل فارقاً .

سوف تظل فى قلبى ، حتى نلتقى مرة أخرى .
ربما فى عالم أفضل .

الوطن مش مكان أو بيت .
الوطن قلب ، نسكنه ويسكن فىنا .
الوطن إيدين ، تضمنا وقت التعب .
الوطن إحساس ، يملانا شغف .
الوطن حضن ، نموت فيه .

أصعب العلاقات ، هى العلاقة اللى شبه علاقة الأرض بالقمر .
بيدوروا حوالين أنفسهم وحوالين بعض .
لا عارفين يقربوا من بعض ، ولا قادرين يبعدوا .

إن أردت أن ترى الوجوه الحقيقية للناس ، فانتظر الأزمات .

نحارب هذه الحياة ، وندعى أننا أقوياء ولا نبالي .

ولكننا فى الواقع ضعفاء .

نبالي ونعاني .

كنا نتشاجر مراراً ، ثم نعود ، لا يقلقنى خصامنا ، ولكنى أخاف أن يصيبها
أذى وأنا لست موجوداً بجوارها لأحميها .

فهى ليست حبيبتي فقط .

إنها طفلتى .

عندما أشتاق لرؤيتها ، أذهب إلى أبيها ، حتى أرى وجهها فى عينيه .

تباً للبعد .

لو إستطعت ، سوف أقلع قلبى من مكانه وأعطيكى إياه .
فما جدوى وجوده فى صدرى ، وهو ليس ملكى .
بل هو ملكك أنتى .

أغضبتنى ، ولكنى أعلم جيداً أن هذا الغضب سوف يتلاشى سريعاً بمجرد أن
أسمع صوتها أو أرى عينيها .
فمن يستطيع الغضب من طفلاته .

الأنثى يجب أن تكون طفلة .
فالسنوات خلقت لعمر الرجال .
أما النساء ، فلهن الدقائق .

أبدا لم يكن وهماً ، لكنه حقيقى ، حقيقى .

ما تسألش .

لكن قلبى لو حكى عنك ، هتحب نفسك وتستغرب كمان .

ذاكرة العقل قابلة للنسيان .

أما ذاكرة القلب ، فلا نستطيع نسيانها أو محوها ، إلا بموت القلب .

إذا أردت أن ترى الذل وقهر الرجال فى صورته الحقيقية ، انظر إلى عينيى
الرجل وهى تنزف دمعها .

فالرجل إذا بكى ، أعلم أنه فقد كل شئ .

ربى ، عظمت إبتلاءاتك لى ، فألهمنى صبراً .

ربى ، ليس جزعاً ، ولكنه ضعف فارحم ضعفى .

ربى ، أحسن خاتمتى ، واجعلها ميتة بلا ألم .

وبعد فترة طويلة ، تأتيني تلك الرسالة المقتضبة .

- كيف حالك ؟-

فلم أستطع الإجابة ، لأنى لا أعلم بالفعل كيف حالى .

ليس كل واقع حقيقة ، فربما يكون كذباً

وليس كل خيال وهمماً ، فربما يكون حياة

قد لا تصلك رسائلى ، لكنى أكتبها كل يوم ، إن لم يكن بمداد دمي فبنبضات
قلبي ، وطنى .

فى إستراتيجيات الحروب ، الخاسر الأكبر هو من كانت المعركة على أرضه
، حتى وإن إنتصر فى الحرب .

كذلك الحب ، الخاسر الأكبر هو من أحب ، وكانت المعركة فى قلبه .

ندعى القوة ، وتهزمنا لحظات من الحنين ، وطنى .

عندما تحب ، وتمنح من تحب كل ما لديك ، حتى حلم عمرك ، ثم يُكذبك فلا
داعى للحديث ، فالصمت أبلغ وأفصح .

الوطن ليس بلداً نعيش فيه ، ولكن الوطن قلباً نعشقه ، ونشعر بالغربة بعيداً
عنه .

أحببتها ، لدرجة أنى أصبحت لا أتمنى من الدنيا سوى أن أموت ورأسى على
صدرها .

نحيا ونموت فى هذا العالم ، ولا نريد سوى أن يتذكرنا أحدهم
ولكننا بشر ، مصابون بآفة النسيان .

عرفت الكثير من البشر ، ولم أجد أحداً منهم فى وفاء السجارة .
تشاركنى أحزاني ، وتمحو غضبي ، وتموت بين أصابعى .

We live and die in this world , just want to be remembered
by somebody .

But , we are human being , suffering from oblivion .

THE LAST WORDS

الحمد لله على نعمة الرضا والصبر

الفهرس

5	آدم وفريدة
16	آشمدادي
27	المعاش
34	عفرت مصباح
40	الغبان
47	كلب الباشا
49	ملكة البيت
56	خمسة عشر عامآ
63	قاتل محترف
74	قلب أتلفه الهوى
76	أشعر بك
77	عايز أسافر
78	ما تستغربش

80	طبيب بلا حدود
85	إن كُنْتُ ذَنْباً
87	إهدى يا حاجة
89	تعرف
91	بامبينو
94	حكاية
96	دنيا تمثيلية
97	عقد ملكية
99	الحاج قطب
106	آه لو الزمن
107	التركة
120	سِفْر الرجوع
139	همهمات

